

KACEFYA, BUSHE

UBUSHIKU BWAFIKA PESA?



[Munyina Gene Goad abelenga Esaya 21:1-12—Kale.]

[Icisendo icaciswebebe icamuli bamba. Ilyo bakankungwala abakumasamba balepita; eico cena cisa ukupita muciswebebe, ukufuma mu mpanga yabipa.]

[Icimonwa icabipisha calandwa kuli ine; kabomba uwa bucenjeshi abomba mu bucenjeshi, kabili konaula nao alonaula. Nina kabiye, O Elamu: shinguluka, O Media; ukuteta konse ukulipo Ninkupanga ukuleka.]

[Eico umusana wandi nawisulamo ubutanshi: ubukali nabwikata pali ine, ngobukali ubwa mwanakashi uukomenwe nefumo: Nakontemeko pakumfwa ico; Nali uwasunguka pakumona ico.]

[Umutima wandi wakalipe, ukutina kwalintinise: ubushiku ubwa kusangalala kwandi ebo apilibwile ukuba ubwa kutinya kuli ine.]

[Pekanya itebulo, mona icamba casansuka, lyeni, nweni: imeni, imwe bacilolo, nokusuba icakucinga icifuba.]

[Pantu efyasosa Shikulu atila kuli ine, Kabiye, nokubika kacefya, leka alande ico amona.]

[Kabili amwene iceleta nabantu bakwensha kabalwe, iceleta lyaba punda, kabili neceleta lya ngamali; kabili akutike ukuposako amano nokukutika kukalamba:]

[Kabili abilikishe, Inkalamo: Shikulu wandi, Ninjiminina mukutwalilila pacamba icasansuka munshita ya kasuba, kabili Nalikala pa cebo candi inshiku shonse:]

[Kabili moneni paisa iceleta lyabaume, nababili bakensha babakabalwe. Kabili aaswike nokutila, Babyloni naiwa, naiwa; kabili nafyonse ifimpashanya fyabaswa ifyaba lesa bakwe ena nafitobaula panshi.]

[O napampelo yandi, namataba yamumushili wandi: pali ico ico Naumfwa ukufuma kuli SHIKULU wa milalo, Lesa uwakwa Israele, eo Nalanda kuli imwe.]

[Icisendo cakwa Duma. Anjitile ukufuma ku Seir, Kacefya, ubushiku bwafika pesa? Kacefya, ubushiku bwafika pesa?]

[*Kacefya atile, Ulucelo luleisa, kabili pamo nobushiku: nga cakutila iwe kuti waipusha, ipusha iwe: bwela, isa.*]

[Pali tepu tapali amashiwi—Kale.]

- 2 Natotela, Munyina Neville. Naciwama ukukumona nakabili.
- 3 Mwashibukeni, kubasambi besu aba Baibele muno lucelo, ilyo twabanensansa ukumuposha mwi Shina lyakwa Shikulu Yesu. Kabili ilyo Nacilaensha mulya mumusebo inshita fye inono iyapitapo, nolupwa lwandi, Nacilatontokanya pabantu abesa kuchalichi panshiku ishamenshi makasa nga bunu, ilyo imfula yabuta ikumana icalo conse, cilaba icakuleta ubusanso pamusebo. Tabesa mukumonwafye. Balakwata umulandu umo uulenga ukuti bese. Kabili Ndi uwansansa nganshi pakumona ili bumba muno muno lucelo, ukutila, nalyo line, “Icicetekelo icabashifwe, cicili ica mweo,” cilebilima mumitima yabaume nabanakashi kuncende shonse.
- 4 I Cebo nacibelengwa na Munyina Gene Goad, muchapitala 21 mwi Buuku lyakwa Esaya, umo twalasambilila, pakashita, elyo nomba tukwate ukupepela abalwele. Kabili nomba pa mutwe we sambililo, muno lucelo, Ndefwaya mfumye mulya, mu 11 ukushinta muvesi ya 12: *Kacefya, Bushe Ubushiku Bwafika Pesa?*
- 5 Kabili ilyo tatulati tulande, natukontamike imitwe yesu pakashita fye mwipepo.
- 6 Shikulu Lesa, Nimwe Lesa waba shifwe. Nimwe Lesa Mwebaputile umupu wakubalilapo uwamweo uwatalile isa pesonde, kabili nimwe mutungulula umweo onse mpaka ino nshita, kabili mukatwalilapofye ukutungulula. Pantu Nimwe Kabumba wa bantunse bonse, kabili ifintu fyonse ifyo fipema. Nimwe Kabumba wafiko.
- 7 Kabili tuli abansansa, muno lucelo, ukucetekela mu mitima yesu ukutila ubulayo Bwenu bwacine, cila umo muli bwena. Kabili muli ubu bulayo, Mwalilanda ukutila apo babili nangu batatu balongana mwi Shina Lyenu, ukutila Muli nokuba pakati kabantu Benu, kabili ukutila Mukasuka ubwite bwabo.
- 8 Kabili kuli imitima yafina ileelo. Nga fintu pakwingila muchalichi, Nacimona abali pamisengele namasanshi ayacingililwa. Kabili bambi nabapeta amashati, kumalwele yambukila—kumalwele yambukila pamaboko yabo. Kabili bambi, Ningumfwa, abo abalufya abatemwikwa. Kabili, oh, lyena lyaba ilyalubembu nesonde ilyabipa! Lelo, nomba, fyonse ifi fintu filingile ukubikwa muli Shikulu Yesu, Uyo uwatwebele, ukutila, “Ifintu fyonse filebombela capamo kubusuma kuli abo abatemwa Lesa.”
- 9 Kabili tuli abatalalikwa muno lucelo, ukucetekela ukutila ifingi ifi fintu fili nokutuleta pamakufi yesu. Kabili twalitemwa ukutontokanya pa Malembo, ukuti, “Abo abalolela

pali Shikulu amaka yabo yakalengwa ukubwekeshiwapo. Bakapupuka namapindo nga kapumpe. Bakabutuka nokukana funshika. Bakenda kabili tabakapomponteke.” Kabili nga fintu kemba atile, “Nsambilisheni, Shikulu. Nsambilisheni, Shikulu, ifyakulolela.”

¹⁰ Leken i fwe, ileelo, ilyo tulelolela ukumfwa ukufuma ku Bukata, kabili ukufuma mukanwa ka Mupusushi wesu, ukupitila mu Mupashi wa Mushilo, ukutula ifwe tuli nokulolela mukushipikisha pakuti tumfwe Ishiwi Lyakwe ukulanda ifintu ifyatemwikwa kuli ifwe, ukupitila mu Cebo Cakwe, nokulanda ukwelelwa kumembu shesu, nokundapa kumalwele yesu.

¹¹ Kabili lekeni tufume pali lino ihema muno lucelo, tulesangalala, nokulanda nga balya abafumine ku Emmausi ukutula, “Bushe imitima yesu tayabilime munda shesu ilyo Alelanda naifwe munshila?” Pantu ifwe mucine twalicetekela ukutula Ena ni Shikulu uwabuuka, ilyo ba Musangile bulya bushiku. Kabili Aali pakati kabantu. Tatwakanake, imitima yesu tayakapomponteke. Lekenifye icicetekelo cesu cipangwe icipya cila ola, muli Imwe. Cipeleni, Taata.

¹² Twa Mipusha ukupala i Cebo calembwa. Nokupala amatwi ayalaumfwa, nemilomo iyalalanda; nokuipela Ubukata Mwebene. Pantu nimwi Shina lyakwa Yesu emo twapepa. Ameni.

¹³ Takwaba nangu umo pali ifwe uushinga sangwa namafya. Lesa talaya ukutalushako kumalwele yonse. Lelo calilembwa, ukutula, “Amaka yakwe yali ayalinga, kabili Ena takatale bika ifintu ifyafulisha pali ifwe lelo ifyo Akatupela ukusenamina kwakushipikisha ico.” Eico twalikwata icitalaliko icakwishiba ico.

¹⁴ Kwitontonkanyo lyesambililo ino ine nshita, panshita iinono, pa cintu cimo ico camoneke ukubikwa pa mutima wandi ama ola ayanono ayafumineko: *Kacefya, Bushe Ubushiku Bwafika Pesa?*

¹⁵ Cali nalimo, pakuwa kakasuba nemfifi. Kabili cali ubushiku ubwabipa mumusumba, pantu kwali ukusoka ukwapelwe, ukutula ena, kacefya bacamba casansuka, alitumine amashiwi ukutula alimwene apatali ulukungu ukwima ukufuma kumipeto yamaceleta. Kabili alyumfwile icongo caamakasa yabakabalwe, akatalamukila apatali.

¹⁶ Lelo ilyo babili abakashana bengeminina pacishima, kabili mubwaice bwabo, inshita yabumusepela, balikwete ifingi ifyakutontonkanyapo, batontonkenye, ukucila pafyo amashiwi yakwa kacefya yali. Nalimo tacali icakutontonkanya napo kuli bena, pantu balifye munshita yabunamayo umunono. Nalimo cali ni pamulandu wakutula kwaliko amalila ilya nshita yabushiku, kabili aba banamayo abacaice balefwaya ukusangwako kuli aya malila. Kabili camoneke ukuba ukutula ukusoka kwakwa kacefya tacali cakubapela amatontonkanyo

ukulingana nefyo baipekenye ukuba kufyakusekesha ifya mwisonde. Eico ilyo ukulanshanya kwaletwalilila, kabili—kabili umo namayo umusepela kuti aeba umbi, “Bushe tacili icabipa nganshi, ukutila, mubushiku bwesu, ukutila twalikwata abepaya ukusangalala nga abo, umo muntu uwingesha uku—ukutusenda ukufuma kunsambu isho twakwata, kabili ukufuma kufisuma ifyo twingaipakisha?”

17 Kabili Ndecetekela ico kuti casuntinkana necilecitika ileelo, ukutila abantu batontonkanya ukutila ilyo uleesha ukubacenjeshako nokubasoka pamasanso ayaleisa, ukutila batontonkanya ukutila imwe muli fye umo umukote uwamibele yakale, umo muntu uyo uleesha ukusenda ukusangalala konse ukufuma mumweo.

18 Kabili kuti twatontonkanya nakabili pabalumendo, ilyo balefuma kucikulwa cakubombelamo, nefinso fyabo ifyalamba kuncito iyo bacilabomba munshita yakasuba. Kabili umo umulumendo umunono kuti aeba umunankwe ukutila, “Nga twasambafye nokuiwamya, panono, mulandu nshi, twalakumana kucikulwa cabwalwa, pamo nga pe. Pantu Ndi uwashininkisha ukutila iwe, John, tauli uwasakamana nembila twacumfwa ileelo, ulya kacefya wapacamba casansuka, uuleesha ukufumya ukusangalala konse mubwikashi, ukwesha ukutweba ukutila kuli ukusanswa ukuleisa. Lelo, namwishiba, twalikwata umulalo wacenjela nganshi payabako. Kabili abashilika besu abengi bali . . . bakumana cila nshita ya bushiku pali iyi ncende imo ine iyo twisako, kabili tulaipakisha isenge capamo, icapala nga u—ukuteye ncunga ukunono, nokunwako ifyakunwako fiimo ifinono. Kabili Ine, palwandi,” ena kuti atila “kana fye ukukutinya palwa ifi fintu fyonse ifyo aba bakacefya balelandapo. Pantu natucetekela ukutila nga kuli ukusanswa ukuleisa ukutila abesu—abesu ba rabi kuti baishiba palwaici, bakakumba besu, kabili bena kuti batweba pa fintu fya musango ngoyo. Kabili tatulesakamana pakumfwa aya amalyashi yakunasha aya abo bakacefya bapacamba casansuka.”

19 Kabili nga ico tacili icikope icapulamo ica calo cesu ileelo, ukutila imisepela yamucalo cesu, kabili temisepelafye, lelo abakalamba bamucalo cesu, nabapena. Kabili bena balakana ukumfwa imisoko. Kabili ilyofye kacefya wacine apela ukusoka, bamubika pawamafundisho yabufi, nangu umo uwapena.

20 Kabili ilyo akasuba kaleya mu bushiku, nalimo umushilika pa mpongolo, uyo ulelonda impongolo, aba uwakukana ikala pamo. Kabili aya ku . . . umupalamano untu balelonda nankwe, nokutila, “Bushe naucetekela ukutila kuti caba cacine ukutila ulya kacefya nalungika?”

21 Namwishiba, kwaliba icintu cimo pakusanswa, kwaliba icintu cimo pamfwa, icikwata ukusokela libela pali cena. Inshita

ishingi abo abatemwikwa ilyo tabalapita ukuya kulubali lumbi, kumoneka kwati kulaba ukusoka ukwisa kuli bena.

²² Kuti natontonkanya pali batata, ilyo tabalasendwa. Balifumine mu Kentucky pamyaka iingi. Lelo, mukupumikisha fye, icintu cimo caendele pali batata, ukuti baye kulya kung'anda iyakale nokulanda nabatemwikwa babo nabacibusa babo.

²³ Panuma yakubwela ku ng'anda, bamunyinabo, abo tabafikilishye ukumona, balisokelwe mucakupapa ukwisa ku Jeffersonville mukubamona. Kabili ilyo baikele, balelanda, bataata bafwile nokuya kuli cilya icalo cimbi.

²⁴ Ndetontonkanya palwa bapongoshi bandi. Inshiku fye ishinono ilyo tabalaya, batile, "Billy, leka iwe na Ine tuleya mukulunga utupale, pamulu wa Utica. Ndefwaya fye ukuya kuncunde iyakale." Munshila imo, mukupekanya kwakwa Lesa, Nalifililwe ukuya nabo bulya bushiku. Kabili bena baile pamulu bulya bushiku nokulunga, kabili ilyo baishilebwela pali sacha, bena—bena banjebele, batile, "Naikele palya pamuulu palupili. Kwena konse kwalicinja nomba. Lelo ukuya mulya mucifutu cimo icamitengo, ku Battle Creek, pamulu wesu fye," batile, "camoneke kwati Naumfwile bamayo balenjita baletila, 'Oh, Frankie!'" Ilya nshita yabushiku bapele ubunte, mumulongo wacibili uwa muno muchalichi, kukuso kwandi, ukukabila amapepo yabantu pali bena. Kabili inshiku ishinono ishakonkelepo, twalibashikile.

²⁵ Cimoneka kwati Lesa lyonse alatuma inkombe. Cena busuma Bwakwe nokusenamina Kwakwe, ukupela icine mumutima ukusoka kwa fintu ifyo filepalama.

²⁶ Kabili Ndi uwansansa nganshi ukutila muli buno bushiku ubo tuleikalama nomba, ukutila, ilyo kuli ubulanda nemfifi konse konse, kulemoneka ukubako isubilo ilyapalwa ukwikata umutima wabantu bakwa Lesa, ukutila ola imo iyabukata Yesu akesa.

²⁷ Kabili muli iyi nshita ikalamba iya bwafya, muli uno musumba, abantu abaice tabaposeleko amano, kabili abantu abengi tabasakamene pafyo kacefya alelanda. Mucine, bena bali mufikulwa fyabwalwa, ukunwa, kabili amalila yaletwalilila. Kabili abashilika bonse balenwa. Kabili balikwete inshita yakusansamuka, batontonkenye ukutila bali abacingililwa ngefyo bengaba. "Takwali icakubasansa," pantu balyakile, nga fintu twingacita, pamipashi yawiski nokunwa ifyasananihiwa.

²⁸ Kabili mukupumikishafye, amaceleta yakunkulukile mumusumba. Nefiibi fyakumayanda yabwalwa fyalipomwenwe, namayanda, nefyanso fyakwipailako fyalebomba, pa mulandu fye wakutila balikene ukumfwa ukusoka kwakwa kacefya.

²⁹ Kabili umulimo wakwakacefya, muli Baibele yakale, aali umuntu uwasalilwe. Alingile ukuba umuntu uwalola kufintu fyamumyulu. Alingile ukwishiba bwino bwino apo intanda

shibelele, ukulanda inshita yapwililika ku bantu. Abengi abanaka, balefuma, nalimo, balefilwa ukulala, balifye abafilwa ukwiala pamo, kabili kuti babilikisha kuli kacefya mucamba casansuka, kabili kuti abilikisha aya mashiwi, “Kacefya, bushe ubushiku bwafika pesa?”

³⁰ Kabili kuti alolesha intanda, kabili elyo atila “Yaba inshita *yakuti-na-yakuti*.”

³¹ Nomba bena balebwelelamo mubusanshi bwabo, nangu konse uko bena basala ukwikala, ukulolela akasuba ukutula, ilyo abanaka, abafunshika, inshita iya bushiku iyabula ukutushamo ingapita.

³² Lesa kwateni uluse! Ndeingililamo nga cakuti tenshita, ileelo, ilyo tatwakutile kuli Kacefya mukalamba ukutula, “Ubushiku bwafika pesa?” Kuli ukusansa ukuleisa, kabili isonde lyonse lilemoneka kwati lilesunkana pesamba lyalongolo lwaico.

³³ Kacefya nao aali nokuba pancito, inshita shonse. Kabili aali nokusoka abantu pakusanswa ukwali nokwisa. Iyo eyali incito yakwe, ukuba uwalola ukumona ukusanswa ukuleisa. Kabili ena aali mucamba ico cakulilwe ukuya pamulu ukucila ifibumba. Kabili umu mucamba, ena akwete kulya, muli cena, amabuuku yantanda, kabili nafimbipo, pakutula engalolesha intanda nokulanda inshita ifyo yaba. Icintu conse icilepalama, ica nshita ya pabushiku, ena kuti acilanda.

³⁴ Nomba, kabili alemona apatali ukucila umuntu onse uwali pamushili. Alemona apatali ukucila uuli onse pacibumba, pantu aali pamulu nganshi. Kabili nga mwaya pamulu, kulaba ukumona ukutali. Kabili kuti walanda amasanso yalepalamina, ukutali ukucila pali ayo yonse ayaba pe sonde.

³⁵ Kabili nga fintu Esaya, mu bushiku bwakwe, alelanda ukutula Lesa amupangile ukuba kacefya. Lesa apashenye bakasesema Bakwe ukuba nga bakapumpe.

³⁶ Kabili nga fintu lyonse Nashimikila pe sambililo lya bakapumpe, kapumpe cuni icingapupuka ukuya pamuulu apatali ukucila pa cuni conse. Kabili cifwile caba icapangwa munshila iyaibela pali ilya imibele iyapatali iyo intu aya mukubamo. Nomba, pungwa tekuti amukonke. Takuli icuni conse icingamukonka. Cena cuni icakwa Lesa icapangwa, kabili cena capangwa ifyo fine. Nga cakutula icuni cimbi caeseshe ukubula icifulo cakwe, cena kuti caonaulwa. Cena cifwile cakwata amasako ayamaka, amapindo ayamaka. Kabili busuma nshi cingacita kuli cena nga cakutula cena tekuti cimone, ukukwata amenso ayasuma ayakumwenako? Pungwa kuti aba impofu ukuya pamuulu palya; tekuti amone. Lelo apatali apo kapumpe afika, kabili efyo ena engamona apatali.

³⁷ Kabili Lesa apashanya bakasesema Bakwe kuli bakapumpe. Bena ebakacefya abo abanina ukuya pamuulu apatali, eico pakutula bena bengamona palya apatali. Kabili amenso yabo

yapangwa aya bumupashi pakutila yengamona amasanso ayaleisa.

³⁸ Kabili Lesa abikile Esaya pamuulu ukusoka abantu ukutila kwali ubwafya ubwaleisa, kabili tabaumfwile kuli ena.

³⁹ Kabili, ileelo, Lesa acili nakwata ba kapumpe, nangu inkombe, nangu abantu bapacamba casansuka, abo abanina pamuulu mu Mupashi, ukuya apatali ukucila fyonse ifyapangwa, kabili nayonse amabomba yamaka, kabili nafyonse ifya kufwailisha ifyaba sayansi. Alikwata abantu abo abapangwa mumibele iyaibelako kuli uyo umulimo, abo abanina pafyakuninapo ifyapa Kalbale, mwi Shina ilyakwa Shikulu Yesu, no kwiminina pa muulu wa capindama, kabili nokutuma ukubwesa i Mbila, “EFYA SOSA SHIKULU.” Ukumona kwabo ukwa bumupashi kwaba ukwakulishapo ukucila pali bashimapepo mwitempele; ukucilapo pa bwikashi bwa muntu; pantu bena baba abapangwa abaibelako ku milimo iyo Lesa abetilapo ukucita. Eico, cilaba icakutwafwa uku kutika lintu twaumfwa pa fintu ifyo ifileisa.

⁴⁰ Nomba Nalacinjakofye pakashita akanono. Nokulenga ukukutika kwenu kube ku Mfumu iya aba bakapumpe, nangu bakasesema, nangu bakacefya bapacamba icasansuka. Uyo ni Shikulu Yesu, pa Lwakwe. Kabili buno bushiku ubo tuleikalilamo bwaliba ubukalamba ukucilapo pa bushiku buntu Aali pano, mpaka, lintu Aali palya pa finshingwa ifya capindama, Alandile ukucilapo pa Kwisa Kwakwe ukwa cibili ukucila pafyo Acitile pakuya Kwakwe. Nga cakutila mwabebeta bwino bwino Amalembo, muli nokusanga ukutila ilyofye ukuya Kwakwe takulabapo, ukutila Aseseme pa fintu ifyo ifili nokucitika muli buno bushiku.

⁴¹ Alishibe ukutila Afwile atanikwa. Alishibe ukutila Afwile acula uwa—uwakaele pababipa. Alishibe ukutila Ali nokubuka nakabili ukufuma mu nshinshi, pa bushiku ubwalenga shitatu. Alishibe ukutila takwali amaka ayo ayali noku Mwikatilila munshinshi, pantu i Cebo cakwa Lesa catile, “Nshakaleke uwa mushilo Wandi Umo ukumona ukonaulwa, nangu Ine ukuleka umweo Wakwe kumbo.” Kabili takwali amaka ayo ayali nokonaula bulya ubusesemo. I Cebo Cakwe cikaba ica cishinka, kabili Fili nokufikilishiwa munshita Yafiko. Kabili Alikwete icakushininkisha icakutila, ico Wishi alandile, Wishi ali nokusunga i Cebo Cakwe.

⁴² Eico, umutima Wakwe uukalamba wali mukati Kakwe, ico icali i Cipuna cakwa Lesa, mu mutima Wakwe Alishibe ukutila ishi inshita ishikalamba ishakweshiwa shili nokwisa nokushininkisha mu fyalo fyonse, nokushininkisha mu bantu bonse. Eico, eakutila, Alishibe ilipusho ilikalamba ilyo ilyalipo, tecakutila Ali nokubuka nakabili, nangu ukutila Ali nokutanikwa umwabela Amalembo, nangu tekutila Ali

nokunina ukuya mu Muulu, kabili Mupashi wa Mushilo ali nokwisa. Lelo ilipusho lyali ilyakutila, “Bushe kuli nokuba icicetekelo icili conse icikashalapo pesonde pa Kwisa Kwakwe?” Kabili nikwisa uko icicetekelo cafumine? “Kupitila mukumfwa i Cebo cakwa Lesa.” Ilyo elyali ilipusho Lyakwe. “Bushe kuli nokuba icicetekelo pe sonde lintu Nkesa?” Bushe Ali nokusanga abantu abacetekela i Cebo Cakwe?

⁴³ Nomba lintu ifwe, munshiku isho tuleikalilamo, kuti twaisula amabula aya Cebo Cakwe icapalwa, nokusanga ifi fine ifintu ifyo Alandile ukuti filu nokucitika, ifyo ifileisa pesonde ileelo, ifishibilo ne fisungusho filecitika: “Imitima ya bantu ilepona ku mwenso.” Kuli “ifyakusungusha fya nshita nefyakutintana pakati ka fyalo. Ifyakumona ifyakutinya mu myuulu,” ngefintu ifipupuka, na Fyonse ukuba ifyafulungana. “Kabili na bamba alebuluma, kabili nefinkukuma mu ncende shimo shimo. Imitima ya bantu ili nokulapona, ku mwenso.” Ifilwilo ifyamaka ifipoleka fyalibikwa, filelelela. Ifimoneka ifyabipa fyakobama pesonde, ifyo isonde talyatala alimonapo kunuma.

⁴⁴ Umulungu wafumineko Nalikwete insambu ishakulanda pamo naumo pali bacibusa bandi kabili naba munyina, Kapitao Julius Stadskev, uyo uwalembela ibuuku, *Kasesema Atandalila Africa*. Kabili Munyina Julius ali mu California, uko uko nomba alesambilila pafya bukalamba bwamu bushilika. Kabili ena. . . Bena, abantu babulwi, bamutwele ku kweshiwa ukukalamba. Kabili bafwailishe icitoto cakwe mpaka bashininkishe nangufye uyo icikolwe cakwe nakulu cali, kabili nelyashi lyabo kabili nafintu bali, ilyo ena talati ekale muli uku ukulongana.

⁴⁵ Kabili lilya linefye afumine mukulongana, aile pamuulu wa lupili apo twaikele pamo nabacibusa bamo, ankumenye kulya kwine pesamba lya cimuti ca yanipa, kabili atile, “Munyina Branham, cena cintu cimo icakunasha ico tawatala aumfwapo.” Atile, “Naba pesamba lya mulapo uukalamba untu Nshingalanda, nangu ukufumya ilyashi ilili lyonse,” atile, “pantu ifwe twaba. . . Batubikile pesamba lyamulapo umo. Lelo,” atile, “Kuti nalanda ici. Ababulwi bali nokupwa. Tabali nokukwata nakabili ababulwi; kukabafyeba bamalonda abanono. Tabali nokukwata nakabili indeke shakupupuka. Tabali noku—nokuposa inshita yabo mukupanga indeke ishikutukisha nefyaba ngefyo, kano shena shabafye shakubomfya mu makwebo. Bena bashintililefye pakutinta kumo pakakutinta kamo. Kuli nokuba ukonaulwa ukwa pwililika.”

⁴⁶ Atile, “Munyina Branham, icintu bwingi tacaishiba ifyankama ifya fintu fyabulwi ifyo fyaba.” Atile, “Lintu aba ba ofisa bakalamba balelanda mu miputule yabo,” atile, “kwaishile ubulanda ubwabipisha mulya mumuputule, mpaka umo uwafyabu sayansi umukalamba aiminineko, nokutila, ‘Kuti

Nafwaisha ukubula iceleta lyakale ne ng'ombe, nokwensha ukubwelelamo ukuya kunuma yampili, nokubyalala ba kabenji na cilemba, nokulabako kuli fyonse palwa cena.' Oh," atile, "cena kuti caba, nga cakutila ili ilyashi kuti lyafuma nokuya ku cintu bwingi, isonde lyonse kuti lyaya muku pupumina. Ubwafya buleisa."

⁴⁷ Atile, "Nabakwata...ukufumya abantu babo nombamba ukufuma ku fishi. Balefumya amabumba yabo ukufuma mu England. Kabili nabakwata ifyombo ifingi ifikele kulya, nefyanso fimo. Kabili balelolola iciunda camunshishinga icakubalilapo, kabili necalo conse ninshi cakakuluka panshita imo ine." Atile, "Takwakabe akacani nangu kamo akakashala pesonde, nangu ulupili nangu lumo lelo icikasunkanishiwa ukupwa. Kabili kuti cacitika pa nshita iili yonse." Oh, ifyo yaba ola iyabulanda!

⁴⁸ Kabili nefe fintu ifyo mumfwa patundeke twabulungana utupupuka. Kabili mwalyumfwile ukulanshanya na ulya muntu, Ndemona, mailo, pa mulabasa, uyo ulanda ukutula ena alilanda kubantu. Nshilefwaya ukusula ulyo mwaume, lelo imibombe yakwe yonse ili iyapusana ne Cebo. Cena tacili icalungama. "Kabili pa Mars, tabakwata imfwa kabili besa pano mukutufunda ifyakukanafwa." Lelo ilyo caisa mukushininkisha, takwete nangu kalitoni nangu kamo akakushininkisha, ako engashininkisha nako. Kwalifye kutontokanya kwakwelenganya uko apangile. Kabili, kwitontokanyo lyandi, cena cabufi, pantu Baibele yalanda icapusanako kufyo ena alanda.

⁴⁹ Kuti nalandapo pafyo Ntontokanya pandeke shabulungana ishipupuka. Nshacetekela ukutula finshingwa. Nshacetekela ukutula fyena fya kwelenganya. Nacetekela...Kabili ici tacilecilenga ukuba icalungama. Litontokanyo lyandi fye. Shikulu tanjeba ukutula ifi efyo fyaba. Lelo, pakulolesha mu Malembo, pantu Palya epo tusanga ifintu fyonse.

⁵⁰ Yesu atile, "Nga fintu cali munshiku sha Sodomu, efyo cikaba napakwisa kwa Mwana wa muntu." Kabili ilyo takulaba ukonaulwa kwa Sodomu, nomulilo wawile nokoca umusumba namalungu, kwaliko ba Malaika abatuminwe ukufuma ku Muulu, abo abaloleshemo nokufwailisha, ukumona nga cakutila ifi fintu fyali ifyacine nangu iyo. Kabili bushe tacakabe fye nga Lesa ukutuma ba Malaika Bakwe kukufwailisha nokusanga, lintu fye ukonaulwa kukalamba takulaisa? Kabili bushe namumona? Kwaliko Malaika umu Uyo uwaishile, Uyo watandalile umwaume umukote uyo wakwete ukusala pali Lesa, kabili ali uwamweo, uwasulwa nesonde, mwitenti kunuma muciswebebe, pantu umuntu umu asalile nokubula ifyuma fyakwe fyonse. Lelo atile, "Ico cili fye bwino. Nalaikala fye muno mubufwayo bwakwa Lesa."

51 Kuti natemwa ukuba mubufwayo bwakwa Lesa ukucila ukukwata indalama shonse isonde lingampela.

52 Kabili lilya line fye kulyo kusala kwakulekelesha kwacitilwe, lyena Malaika wakwa Shikulu aishile kuli Abrahamu kabili atile, “Lolesha kukabanga, kumboshi, kukapinda kakukulyo, nakumasamba. Cena conse cobe, Abrahamu.”

53 Amalembu yalatweba ukutula, “Balishuka abafuka: pantu bakapyana isonde.” Bupusano nshi cipanga? Ifintu fyonse ifya pesonde fikonaulwa nesonde, lelo Lesa tekuti onaike.

54 Kabili Nincetekela nga fintu, Ntungulwilwe ukucetekela, emukutula, nge cikope cakwa Malaika wakwa Shikulu Uyo uwisa nokulingulula . . .

55 Bushe mwalimona Malaika Uyo uwaishile kuli Abrahamu? Ena afutatile inuma Yakwe kwi tenti, ilyo Alelanda kuli Abrahamu, kabili atile, “Ndi nokusunga ubulayo Bwandi kuli iwe.”

56 Oh, ifyo yaba i Mbila yakwa Malaika wakwa Lesa muli buno bushiku, Uyo uli nokusunga ubulayo Bwakwe! Ukukana cetekela konse ukwesonde, bakasusha, abalwisha, nabasenshi, nabakana ukucetekela, tabakatale lenga Amaka yakwa Lesa ukukana kwata amaka. Yena yakacitika fye cimo cine.

57 “Nkebukisha ubulayo Bwandi, kabili Nkalenga ubulayo Bwandi bukabe ubusuma.” Kabili Sara alisekele mwitenti kunuma Yakwe.

58 Kabili ne numa Yakwe iyafutatila kwitenti, Atile, “Mulandu nshi Sara acisekela?”

59 Kabili Sara abutukile panse nokutula, “Nshaciseka,” pantu aali nomwenso.

60 Muntu wa musango shani uyu? Ndesunguka ni Kacefya wa musango shani uuli pacamba casansuka nombaba? “Mibele ya musango shani ili naifwe, nenuma Yakwe iyafutatila kuli ine, kabili nombaba aishiba ukutula Naciseka, mwitenti?” Ibukisheni, Ena aali ni Kacefya.

61 Kabili Alipilibwike, kabili Atile, “Ee, waciseka.” Kabili alitinine.

62 Nomba, tulemona nakabili, ukutula muli buno bushiku lintu fye Ukwisa kwa kwa Shikulu takulabako, aba Bantu balingile ukubwela nakabili. Kabili Ndetontontanya, ilyo tulelolesha mumbali nokumona icifyalilwa ca Bena, lolesheni ifyo Bena balecita, kabili Ndetontontanya nga cakutula ifi fintu ifingi ifyakupapusha tafili filya fine ifyo Yesu alandile ukutula fikacitika. “Kukaba ifishibilo mummyulu. Kabili mwi sonde mukaba ukupelelwa pakati kafyalo, ukusunguka kwa nshita, ifinkukuma muncende ishalekana lekana, kabili abaume ukufwa nokusanswa kwa mutima.” Te banakashi; abaume.

Abanakashi tabafwa ilingi line nobwafya bwamutima. Bena baume. Cena cilefikilisha ifyo Yesu alandile ukutila cikaba. Cena nifilya fine ifyo Alandile ukutila efyo cikaba.

⁶³ Kabili nomba ilyo tuletwalilila, ola panuma ya ola, pali bakasesema bonse, ifyo baseseme pali buno bushiku. Bushe tekuti cilenge umo ukwita ukutila, “Kacefya, bushe ubushiku bwafika pesa?”

⁶⁴ Pentagon takwata ubwasuko. United States takwata ubwasuko. Germany, Russia, tapali nangu umo muli bena uwakwata ubwasuko. Sayansi tayakwata ubwasuko.

⁶⁵ Ninani akwata ubwasuko? Kacefya, uwaba pacibumba, ewakwata ubwasuko. “Kacefya, ubushiku bwafika pesa?” Kabili Mupashi wa Mushilo e ulya Kacefya uletheyanya abantu, nokupela ifyakusoka ukufuma kuli Lesa. Alibikwa nga Kacefya. Tulamona abalwele balepola, amenso yapofwile yashibatuka, amatwi yakomene yakomonoka, ifilema fileenda, ifilema filetoloka... ukwenda nge nsebula. Ukufikilisha i...Cena ni cinshi? Cena Kwisa kwakwa Shikulu, ukuleisa.

⁶⁶ Kabili fyonse ifi fintu, kabili uku ukukusoka! Kabili nabantu baletwalilila ukusunka ukuya kumalila yabwalwa, mpaka inshita yabupumbu bwabo. Kabili bena balashana. “Kabili bena balashana, kabili balalya, kabili balanwa, kabili balopa, kabili bapelwa mucupo,” nga fintufye Lesa alandile ukutila efyo cikaba. Takuli inshila yakubaleseshamo.

⁶⁷ Kanshi nga mwamona, muli iyi nkulo ikalamba iyachalichi, ukulingana no Kusokolola 3, pali iyi nshita nomba e ulya uwapelwe Ulutanda lwa Lucelo, lintu fye Ukwisa takulabako.

⁶⁸ Moneni ifyo Esaya mu Malembo ali ilyo atile, “Kacefya, bushe ubushiku bwafika pesa?” Atile, “Ulucelo luleisa, kabili no bushiku pamo.” Cinshi? Ulucelo luleisa, lelo ubushiku bwisa ilyo ulucelo talulafika. Cali ni cinshi? Uuli onse alishiba ukutila lintu fye takulaba akasuba, ama ola yakuca kwanshita yakasuba, kulesa mukufita ukucila efyo kwaciba.

⁶⁹ Oh, bacibusa bandi, umfweni kuli EFYA SOSA SHIKULU. Nga mulemona ine ukuba umubomfi Wakwe, cena cilifye ilyo akasuba takalatula. E mulandu wine ubu bulanda ubwabipisha bubelele pesonde. Cili fye lintu Ukwisa kwa kwa Shikulu Yesu takulafika. Takuli nakabili isubilo ilishele mucintu cimbi kanofye Ukwisa Kwakwe.

⁷⁰ Ifyalo fileimina ifyalo. Kabili balyangalila mu cikulwa cakwa Lesa ica kwesha mpaka bakwata amaka yakonaula umo nomubiye mumito yamabomba ya atomic. Kabili babifi, kabili tabapepa, kabili tababa nga-Kristu. Kabili ipange bakwatafye, netontonkanyo, konaula. Kabili bena bali abaputwamo na malaika wakonaula uyo watumina ukufuma kumulu kukuputamo aba baume.

⁷¹ Lekeni nande, mwi Shina lyakwa Shikulu Yesu, Mupashi wa Mushilo watumwa nga Kacefya wacamba casansuka. Kabili ilyo abantu balebilikisha ukutila, “Bushe ubushiku bwafika pesa?” Bushe uli uwafunshika kuli ubu bwikashi? Bushe uli uwafunshika ku lubembu? Bushe walinaka kufiililo, na malwele, nokukana shila kukukana shila konse? Bushe ubushiku bwakokola nokuba uwakuleta ukunaka? “Bushe ubushiku bwafika pesa, Kacefya?”

Atile, “Ulu celo luleisa.” Moneni icitalaliko?

⁷² “Kabili inshita yabushiku nabo bwine buleisa.” Ni cinshi inshita ya bushiku? Lolesheni ifyo caampana mukupwililika na Malembo, Esaya aali. Mumibele ya—yacifyalilwa, lyonse ilyo akasuba kalatula kakolonganya imfifi pamo nokukulenga ukumoneka ukufita. Kulafita ilyo akasuba takalatula ukucila inshita ili yonse iyamubushiku. Mulandu nshi? Cena lubuuto ululepalamina ululelenga ukufita.

⁷³ Kabili kupalamina kwakwa Shikulu Yesu nomba ekuleleta ubulanda pesonde. Bushe Ena tatile, “Ilyo ifi fintu fyatendeka ukufikilishiwa, mukenune imitwe yenu, pantu ukulubulwa kwenu kulepalama?”

⁷⁴ Palestine calo. Aba Yuda balibwela ukufuma mwisonde lyonse, kabili babikwa kulya kukumona Ena ukwisa, nga fintu Lesa alandile ukutila bakacita. “Sambilileni umulumbe wacimuti camukunyu, nga catwala utumabula ututeku.” Atile, “Efyo cikaba ukutila ino nkulo tayakapwe, tayakapite pamo, yena tayakapite iyo, mpaka fyonse ifi fintu fikacitwe.” Ninkulo nshi? Inkulo iyo imona icimuti ca mukunyu cabalula. Israele lyonse aba icimuti ca mukunyu.

⁷⁵ “Ifyo makanta uupwishishisha ashile, makanta uumeng’anya alile,” efyo Yoele alandile. “Ifyo makanta uumeng’anya ashile, insokanda shalile. Kabili ifyo insokanda shashile, makanta alile.” Kabili nga kuti mwamona, ico cishishi cimo cine. Cila cimo pali ifi fishishi ifilya icimuti, cishishishi cimo cine, lelo panshita yakukula iyapusana. Kabili ulubembu lumo lwine nokukana cetekela uko kwatendeki ukulya aba Yuda, ukutila, “Yesu tali ni Kristu,” ukwalile cilya cimuti ukucilenga caba icishilikiti. Kabili kasesema alimwene ico, kabili alililile. Lelo Shikulu atile, “‘Nkabwekeshapo,’ efyo asosa Shikulu, ‘yonse imyaka iyo makanta uumeng’anya, kabili makanta, na makanta upwishishisha alilile.’”

⁷⁶ Kabili panshita iyakubalilapo pamyaka amakana yabili nemyanda isano, aba Yuda balebwelelamo kumpanga yakumwabo. “Ilya nkulo tayakapite, tayakapite, mpaka fyonse ifi fintu fikafikilishiwe.” “‘Nomba Nkapingolola u Mupashi Wandu munshiku shakulekelesha,’ efya sosa Lesa, ‘pa bana Bandi abaume na banakashi, kabili bena bakasesema. Kabili Nkalangisha ifisungusho.’”

⁷⁷ Abalwele baleundapwa, amaka ayakalamba yalecitwa, ku Mupashi umu wine uyo waikela kabili kuti aeba Abrahamu ukutula Sara alisekele mumuputule kunuma Yakwe.

Nomba twabilikisha ukutula, “Kacefya, bushe ubushiku bwafika pesa?”

⁷⁸ Kabili atile, “Ubushiku buleisa.” Moneni. Ubushiku, intanshi. . . Ulucelo luleisa, intanshi. Elyo, inshita ya bushiku, pamo.

⁷⁹ Ilyo ubushiku tabulaca, lyonse kulaba ulubuuto ulukalamba ulubikwa mummyulu, kabili lulya lutanda lwalucelo. Ilyo mwamona ulutanda lwalucelo luleya lulebutilako, ukubuta kabili ukubuta, lyena isonde lileya lilefitilako nokufita. Kabili umulandu untu lubutila, ni pamulandu wakutula isonde nalifita.

⁸⁰ Kabili i Chalichi ca shino nshiku shakulekelesha, abaitwa kabili u Mubili uwasalwa uwakwa Kristu, calilaiwa kuli Baibele ukutula Ena ali nokubapela Ulutanda lwa Lucelo.

“Kacefya, bushe ubushiku bwafika pesa? Nicinshi calacitika?”

⁸¹ Ici cili apa. Ukonaulwa umupwilapo kuleisa kwisonde lyonse. Lelo ilyo cilya tacilapwa ukucitika, i Chalichi cakwa Yesu Kristu cili nokuya mu Kusumbulwa, mukukumanya Shikulu Wakwe.

⁸² Ngo lutanda lwalucelo nicinshi luli nokucita? Cinshi icilenga intanda ukuba ishabuta pali ilya nshita? Cena kupalama kwakutula kwakasuba. Ulutanda lwa lucelo lulalangisha ulubuuto lwa kasuba. Intanda shimbi shimoneka ukushibantukila pali ilya ola.

⁸³ Yonse amasambililo yamipepele ayapangwa nabantu, ukutalalila, ubwafyakukonka bucaibela bukoma. Lelo ulya kacefya naikala palya pacamba, no Lutanda lwa Lucelo, cili nokulangisha i Mbila iyacine iyakwa Shikulu Yesu iili mupepi ukwisa, pantu Alebutilakofye nokubutilakofye, inshita yonse, ilyo akasuba katampa ukwima.

⁸⁴ Oh, kuti Natila, intanda shalucelo, imeni nokubalika kubukata bwakwa Lesa, pantu ukupalamina kwamfifi yanshita yabushiku ili pesonde, kabili nemfifi ikalamba pabantu. Lelo ulucelo luleisa, kabili nentanda shilingile ukupela inyali shashiko.

⁸⁵ Tontonkanyeni pali ilya inshita iya kutinya iyo ili mupepi nesonde lyonse. Tontonkanyeni pali bulya bulanda ubwabipisha ubo buli pamuntu onse ushapususuka ileelo. Ifyalo fyonse, nempili shonse, nefilime fyonse namayanda yonse ayo balebekelwamo, yakasanguka imito, kumito yamililo nakabili, mukashita akanono, mukukapa kapa kwelinso.

⁸⁶ Lelo abo abatemwa Shikulu, abo abakwata Ulubuuto lwa Ntanda lwa Lucelo, kabili balebika—balebika amenso yabo pali

Ena, nokufuma pafintu fyamwisonde! Kabili nga fintu Paulo alembele munkalata yakwe iyakwsalila, ilyo talafuma pesonde, ali uwafunshika, nokusakamana nomwenso, nokunaka. Oh, ifyo Ng'umfwau pali ulya umu Yuda umunono. Ilyo atile, "Mwileka nangu umu ukuncusha. Nalilwisha ubulwi ubusuma, kabili Nimpwisha umulimo wandi. Nalisunga icicetekelo. Kabili ukuya pantanshi kuliko icilongwe cabulungami ico Shikulu Kapingula wabulungami akampela pali bulya bushiku." Elyo atontonkenye pa ntanda sha lucelo ukwisa, atile, "Tekuli ine fye neka, lelo kuli bonse abo abatemwa ukubwela Kwakwe." Oh, "Inuneni imitwe yenu, ukulubulwa kwenu kuli mupepi."

⁸⁷ "Kacefya, cinshi cilenga ipepala ukulanda ici? Cinshi cilenga sayansi ukutina ukusela? Ni cinshi icilenga Pentagon ukutina ukufumya ilyashi?" Pantu abantu kuti ba ipaya nokuposa indalama shabo mumisebo, nefintu. "Nicinshi... Nicinshi cilubene? Nicinshi? Bushe ubushiku bwafika pesa?"

⁸⁸ "Ulucelo luleisa." Ico nacilungama. Cena conse nicinshi? Kupangika kwalucelo, ululeisa, kabili lulesunka u Lubuuto. Cilelenga imfifi yatola ukwisa ilyo Ulubuuto talulatampa ukusanika.

⁸⁹ Ndi uwansansa ukuba umwina Kristu. Ndi uwansansa nganshi ukutila Ndi kacefya Wakwe, umu pali bona, uyo uwiminine pacibumba, alebilibikisha, "Ipekanye ukukumanya Lesa, pantu ola iya Kwisa Kwakwe ileya ilepalama."

⁹⁰ Kabili imwe, muno muli cino chalichi muno lucelo, nga kuliko umu uyo ushileshininkisha ukutila Ulutanda lwa Lucelo lulelangisha u Lubuuto lwa Luko mumutima wenu, u Mupashi wa Mushilo ukalamba, lekeni imwe muipekanye pali ico. Pantu kuliko icintu cimo icikalamba nganshi ico catalile citika, icili mupepi ino ine nshita. Twiminine pampelekesha, tuletamba icangalo cilepekanishiwa.

⁹¹ Nalikwata inshita ishingi isho ntamba ubunkolanya, ifyo mu Hollywood namuncende ishapusana pusana, ukupekanya amangalo yabo. Nafintu basenda abaishibikwa babo, nabambipo, nokubapekanya. Nefyo babakansha nefintu fyonse ilyo ubwangalo ubukalamba tabulacitika. Lyonse ndapapa pakutamba ico, nokwishiba ukutila cali nokuba icabufi.

⁹² Fyonse ifyabufi fipangwa kufituntulu. Tekuti kube dolla yabufi kano kwaba iyacine. Tekuti kube bumbimunda kano kwabako umwina Kristu umwine mwine. Tekuti kube imbila iyabufi kano fye kwaba Imo iya cine. Tekuti kube inshita yabushiku kano kwaba inshita yakasuba. Mucine!

⁹³ Kabili ilyo Nabatambile ukupekanya amangalo yabo, kabili Natontonkenye ukutila, "Oh, ifwe natwiminina kulya lubali pacamba, ukucilapo pacintu conse muli lino isonde, kabili tuletamba ifintu fibili ifikalamba nganshi; ukupwa kwanshita, kabili no Kwisa kwakwa Shikulu." Nombaline,

“Inshita ikapwa.” “Inshita ikapwa,” kabili Ukwisa kwakwa Shikulu.

⁹⁴ Kabili munkanyakristu, alikwata abantu bakwe bekele kulya. Alikwata kommunismu. Alikwata ifikomo ifyapusana pusana: ena alikwata chalichi, alikwata bu Katolika, alikwata bu Protestanti. Alipekanya fyonse, ukuti apange icakulangisha icikalamba.

⁹⁵ Lelo Ndi uwansansa nganshi ukutila kwaliba Taata mu Muulu, Uyo uwakwata imibele Yakwe, nao, pali ubu bwangalo bukalamba. Iyo mukanyakristu abatwala mukufwa kwafyonse fintu, nakunshita, Lesa ali uwaipekanya mubwangalo Bwakwe ukwimya i Chalichi Cakwe ukuya mu Muyayaya, muncende shabulwi isha Muyayaya, pamo na Lesa Umwine eka. Iyo, iyi mibili iyakale ikapilibulwa nokupalana no Mubili Wakwe Wine uwa bukata, kabili ici cibola cikafwla icishifwa, kabili mucata Cakwe ifwe tukeminina umuyayaya.

⁹⁶ Lolesheni! Mwebaletamba icitunshi tunshi, mwebaleumfwa kucilimba, mwebabelenga amapepala yenu, mwebatemwa ukumfwa ilyashi kabili mulasunguka ifyo ici cili, kutikeni kwishiwi lyandi: “Ulucelo luleisa, kabili ubushiku buleisa nabo.” Ulucelo luleisa kuli abo abali abahiteyanya ku lucelo, kabili ubushiku buleisa kuli abo abashahiteyanya kulucelo. Leken! Lesa apekanye imitima yesu ileelo.

⁹⁷ “Pantu bukaca ubwa Muyayaya uwabengeshima kabili ubusuma.” Kabili nga fintu kema alandile, “Abo abasalwa Bakwe bakalongana kumwabo ukuciluka ulwelele. Lintu amashina yaketwa kulya, Nkabako.”

Natupepe.

⁹⁸ Muli ino nshita yabulanda pesonde, kabili nokonaulwa konse, Shikulu Lesa, ifwe tuli... Ifwe tekutifye tulangishe ifyo ifwe tuleumfwa, kabili nokutotela nokutotela mumitima yesu, ukuti Yesu Kristu aikile ukufuma mu Bukata, kabili apangilwe mumuntu nga ifwe, aikele pakati kesu. Kabili nomba lintu Afwilile imembu shesu, aishile ukupitila munshila ya Paradise, nokusenda imyeo iyalelolola, alepwile ukupita pamaka ayamipashi yonse ayo ciwa akakile icalo nayo, nokupanga imyele yalubuuto, e ico ulubuuto lwa kasuba ulwa kusenamina kwa kwa Lesa ukwa Muyayaya kuti lwabalika pali abo abalefwaya ukulupokelela.

⁹⁹ Lesa, peleni ileelo, ukutila abantu ukuli konse bali nokwangufyanya, ukwangufyanya, ukwingila mu Bufumu, pantu i Mbila lyonse yaba iyakwangufyanya. “Angufyanyeni, angufyanyeni, fumeni!” Malaika atile, mu Sodomu, “Ine tekuti ncite nangu cimo mpaka imwe mwaisa kuno.” Shikulu, peleni, ukutila nangula i Mbila ili iyaisulamo ukusenamina, namaka, nokutemwa, lelo nomba cena cili icakwangufyanya. Fikilisheni, Shikulu, ukuti abantu bwangu bwangu baye nokupokelela

Kristu nokwisushiwamo na Mupashi wa Mushilo. Pantu Yesu atile, “Abo ababa abakwa Lesa, bomfwa Ifyebo fyakwa Lesa.” Leken i bese nokulapila kumembu shabo, nokubatishiwa mwi Shina lyakwa Shikulu Yesu, kukwelelwa kwamembu shabo, nokwisushiwa na Mupashi wa Mushilo; ukubika imyeo yabo mumibele intu chalichi cakubalilapo calimo, eflyo cikaba ilyo Mukesa.

¹⁰⁰ Twatasha pa Mbila, kabili twapepa ukutila Mwala Ipala, Shikulu, ku busuma bwa mitima yesu, ilyo tulelelela pali Imwe. Mwi Shina lyakwa Yesu twapepa. Amen i.

¹⁰¹ [Tapali amashiwi pali tepu. Kalisha wacinanda atendeka ukulisha *Ilyo Balisha Inyenjele Ya Golide*.—Kale.]

Umo na umo ifwe tukesafika pa mwinshi,
Kulya ukwikala pamo nabashifwa,
Ilyo bena balisha shilye nyenjele isha golide
kuli iwe na ine.

¹⁰² Bushe ta mwa Mutemwa fye? Nomba, imbila yapwa, katu Mushinshimune fye ngeflyo, mu Mupashi. Ukubafye... Ena ali pano. Aya kalamba, amashiwi ayakosa, lelo yacishinka. Njalandila mwi Shina lyakwa Kristu. Ukupalamina kwa bushiku bulya. Nga mwampela... Ndefwaya ici... [Tapali amashiwi pali tepu—Kale.]

... iwe na ine.

Leken i twimye fye ukuboko kwesu.

... na mumfwa...
Bushe ta muleumfwa ba Malaika baleimba?
Kwena Kusefya kwa alleluya yabukata.
Nikulya ukutali ukwape ukwawama,
Ukuciluka fye umumana uwabalika,
Ilyo balisha inyengele sha golide kuli iwe...

¹⁰³ Ilyo alelisha ico nakabili, leken i tuposhanye mumaboko nomuntu umo uuli mupepi na imwe!...?...

... ukwape ukwawama,
Ukuciluka fye...
Ilyo i... ukufika fye kulya ku lulamba ku
cicetekelo...

¹⁰⁴ Landefye kuli umo nomunankwe mutile, “We mulebeshi, Ndi uwansansa ukuba pamo naiwe.”

... umo tufika pa mwinshi,
Kulya ukwikala pamo nabashifwa,
Ilyo bena balisha shilye nyenjele isha golide
kuli iwe na ine.

Bushe tamuleumfwa inyenjele nomba shilelila?
Bushe tamuleumfwa ba Malaika baleimba?
(Cena ni cinshi?)

Kwena Kusefya kwa alleluya yabukata.
 Nikulya ukutali ukwpe ukwawama,
 Ukuciluka fye umumana uwabalika,
 Ilyo baimba shilya. . .

¹⁰⁵ Ico caleta fye icintu cimo kumano yandi. Umukashi wandi, kunuma kulya, alecibukishafye bwino. Nalikwete insambu ishakutandalila ichalichi cakale icaku Pisgah, isukulu lya Baibele mu California. Nalikwete ukulongana kwabushiku bumo nabo. Iyo yakale, iyakubalilapo ing'anda yamaka. We ncende yawama we! Nalikumenye kakumba, Munyina Smith. Namwishiba, balalemba ipepala. Balikwata ubwafwilisho. Tabapela umusangulo. Ifintu fyonse fyabupe fye. Kabili bena balibapo pamyaka amakumi yasano nokulundapo. Catampilwe na dokota uwalemene, aishile ku Califonia mukwafwiwa. Dokota atile, "Tapali nangu cimo icingakucitilwa."

Ndecetekela ni Dokota Price nangu umuntu umo, ewamupepeleko, mulya mumuputule ulucelo lumo. Tawete ifyafuminemo, mukumoneka, palya pene. Ico tacipilibula icintu nangu cimo. E ico, alitendeke. Atile, "Munshila imbi, imbi, Nincetekela, nangula." Kabili ilyo atampile ukunyanta ulukasa lwakwe pamusebo, ukulu kwakwe ukwalemene kwalyololweke. Aishile kuula Pisgah Home.

¹⁰⁶ Inshita imbi iya bushiku Nali kulya, mukushimikila. Bena balititikene muli cilya cikulwa icikalamba, kabili imyanda ne myanda baiminine monse mumisebo nefintu fyonse, uko bafiikile kunuma. Kabili panuma ya Mbila ukupwa, icintu cimo calicitike, ifintu fibili ifyo Nshatala monapo mumweo wandi. Bena tabali fye ibumba lya bantu abo abatemwa ukupanga icongo icingi. Bena tabali ibumba lya bantu abo abaikele, abauma. Bena bali abantu abaisushiwa no Mupashi. Kabili Naliipakishe lilya isenge ilyawamisha. Kabili ilyo ifwe twali. . .

¹⁰⁷ Ilyo fye Nshilati ntendeke ukupepela abalwele, batampile ukwimba icintu cimo icawama ngefyo. Kabili Naliminine, kabili Nalisungwike. Natile, "Kuliko icintu cimo icilecitika muno. Nshileiluka." Naumfwile nakabili, kabili Naumfwile ba kemba babili. Natile, "Kulingile kwabako icintu cimo icalubana." Kabili Nalipukwimye umutwe wandi. Kabili, ku matwi yandi, nakabili. Natile, "O Shikulu, limbi ciunda cimbi ukufuma kuli ba kemba *pano*." Ndeumfwa na bambi pa mulu *pano*, pamulu sana, pakansonshi kamutenge. Natile, "Cena cilingile ukuba kulya lubali." E ico Nalyendele ukufuma ku citamba caba kapyunga, ukuya uku lubali kuncende yaba kemba. Cena cali kulya lubali.

Kabili Na—Natile ku mukashi wandi, Natile, "Bushe uleumfwa ico, wemutemwikwa?"

Atile, "Ni cinshi ico?"

"Nkashi Arganbright," Natile, "bushe uleumfwa ico?"

Atile, “Ee. Nalicumfwapo ico panshita imo, mumweo wandi.”

Naile kuli Munyina Arganbright, “Bushe ulecumfwa cilya?”
“Ee.”

¹⁰⁸ Cila muntu ne mitwe yabo iyakontamikwa, baleimba. “Oh,” Natile, “nalimo . . . Nde—Ndefwaya ukuba uwashininkisha. Nshilefwaya ukuba uwatwishika, lelo, Shikulu, nga Ndi kambone Wenu, nga Ndi no kuba kacefya, Ningile ukwishiba ico Ndelandapo. Ningile ukuba uwashininkisha pali ici.”

¹⁰⁹ Nga ukundapwa kwa Bulesa, nga Nshili uwashininkisha, Ine nshili nokulandapo nangu cimo palwa cena. Nga Nshili uwashininkisha ukuti uku e Kwisa kwa kwa Shikulu, Ine tekuti ndande nangu cimo palwa cena. Ningile ukuba uwashininkisha.

¹¹⁰ Nabwelele panshi pa cintamba nakabili. Umuntu onse nemitwe yabo iyakontamikwa.

¹¹¹ Kabili ubwite bwa ku cipailo, abantu abengi babikile indupi shabo pa windo, baleisa kuli Kristu. Kabili baleimba. Lintu Nafikile panshi apa, Natile, “Shikulu, cena tekuti cibe. Aba bantu baleimba pesamba *pano* bali fye abantu yawe yawe, lelo aba bali pamulu *apa* baleumfwika kwati banono . . . Nalimo amakana yabili nangu yatatu ukwimba, *muno*, lelo camoneke kwati nalimo kuti kwaba amakana umwanda mu mulu *mulya*.” Kabili yali yamo pa mashiwi ayawamisha, amashiwi yapa mulu nganshi, kwati mashiwi ya banakashi. Naumfwile, kabili fye ukututuma kwaishile pali ine.

¹¹² Naishilebwela nakabili pali miniti fye. Naumfwile. Nalyendele, pamulu. Nabwela, pantu batwalilile fye ukwimba mu Mupashi. Nalyumfwile nakabili. Talyali *nili* ishiwi. Nalebomfwa pesamba *pano*, umusango we shiwi limo; kabili ili pamulu *apa*, umusango umbi uwe shiwi.

¹¹³ E ico ilyo ukulongana kwapwile, Natile kuli kakumba, “Kakumba, Ningumfwa icintu cimo iceni.”

Atile, “Caciba ni cinshi, Munyina Branham?”

¹¹⁴ Natile, “Nacumfwa a—ayapamulu amashiwi ya banakashi, mu yakanshiwa nganshi amashiwi, yamo ayawamisha ayo Natala umfwapo mu mweo wandi, pamulu *palya*.”

¹¹⁵ Atile, “Cena calyumfwikapo inshita ishingi muno, Munyina Branham.”

¹¹⁶ Nalibelengele pali na cifyashi umukote . . . Oh, Nalaba ishina lyakwe nomba, uyo walepepela abalwele. Kabili inshita imo iya bushiku panuma kakumba aisela imbila yakwe, na cifyashi umunono aile mukupepela abalwele. Akwete abali basano nangu mutanda abana abashingulwike, pamo nankwe. Kabili aiminine nokukutika. Kabili Misisi Woodworth-Etter, ngaimwe bonse

mwalitala belengapo ibuuuku lyakwe. Kabili alyumfwile, atile, “Bakemba baleimba pamululu baleimba mu chalichi.”

Panuma yonse amashiwi yaleka, panshi *pano*, Cena cilatwalilila ukwimba, mwamona. Kabili Naiminine palya.

117 Kabili lilya line fye, kulya kunuma ya cikulwa. . . Moneni ifyo mu mutande, ukupwililika? Nomba, Na—Nalicetekela mukulandila mu ndimi. Nalicetekela cena cabupe cakwa Lesa, ico caba mu chalichi. Ndecetekela calibomfeshiwa bubi bubi nga ifyo Amalembo yambi yabomfeshiwa bubi bubi, lelo kwaliba icituntulu cimo. Ee. Kabili uyu mwaume alimine kunuma ya cikulwa, kunuma sana, kabili alandile nalimo ifyebo fine nangu fisano mu lulimi lumbi. Ta—tacalifye. . . Cali ci—citundu. Kuti waumfwa. Umuntu onse ali tondolo.

118 Kabili Icintu cimo caishile pali ine, Nshatalile kwatapo ubwilulo, mumweo wandi. Kabili Nshacibomfeshe lyena, pantu Nali nomwenso. Filya fintu fyakwa Lesa. Tamulingile ukwangala na fyena.

119 Kabili Icintu cimo catile kuli ine, “Kakumba alapepa ipepo lya cicetekelo.” Nalisele akanwa kandi. Kabili Nalilolele. Kabili Ici calishile nakabili, amabimbi ukwisa, kabili catile, “Kakumba alapepa ipepo lya cicetekelo.”

120 Natontonkenye ukutila, “Shikulu, Nshakwata ifyabupe ifya kwilula. Icandi kupepelako abalwele, eico Nshakwata ifyabupe fya kwilula.” Kabili Nalisele akanwa kandi nakabili no kwiminina shilili.

121 Kabili lilya line fye kakumba aiminine nokutendeka ukupepelako abalwele. Oh, Ena ni Lesa! Ubulwele bwalyundepwe, monse mucikulwa, ukuli konse. Cena ni cinshi? Ukuca kwakasuba. Kuliko umusambo uunono uusheleko. Mwisakamana. Lesa tatalabapo ukwabula inte.

122 Ukucetekela nomba ukutila cimo icikalamba icakupapusha, pa cifulo cimo, limbi te mwi shiwi lya bu Malaika, lelo icintu cimo cili nokulenga umubembu onse, nga kuliko uwamusango ifi muli cino cikulwa, ukwishiba ukutila inshita ya bushiku ileya ilefitalako nokufitalako pesonde, nemfifi iyatola. Lelo Ukwisa kwakwa Shikulu kuli mupepi, cinshi icilecita ico. Kabili ilyo kacefya wenu, kuti Natile, “Ulucelo luleisa.” Beni abaiteyanya, intanda sha lucelo, ukubalika!

123 Nibanga abenga temwa ukubebukisha mwi pepo lya kwisalila ilyo tatulaya? Imyeni fye ukuboko kwenu.

124 Mwe Lesa uwatemwikwa, Mulemona abantu ilyo baleimya amaboko yabo. Kabili bali abacishinka muli ici. Abengi pali abo abafwaya muma pepala ye lyashi, balifwailisha mubaishibisha, ama buuku na malyashi ayalebwa aya fintu ifya lekana lekana, lelo nomba bena tekuti basange ubwasuko. Lelo ici caisa, muno lucelo, muli Baibele. “Ulucelo luleisa, na ubushiku buleisa

pamo.” Kabili tulepepa, mwe Lesa, ukutila Mwalapaala umuntu onse muno, uyo wacimya amaboko yabo. Kabili Namwishiba icili kunuma kwa kulya ukuboko ukwimishiwe. Kabili, Shikulu, Ndecetekela cilya palya pene apo bekele nomba, ukutila Lesa uwaba konse konse aliba uwalinga ukwakanya kuli bena ubupyani bwabo ubwa Mupashi ubo balefwaya pali ino ola. Peleni kuli cila umo, Shikulu. Pa mulandu wa Cebo Cenu no kukabila kwabo, kabili no bulayo Bwenu ubwa Bulesa ubo bushingafilwa, lekeni bapokelele cilya ico bemishepo amaboko yabo, ilyo Ndepela ili pepo mu kubeminako bena. Mwi Shina lyakwa Shikulu Yesu, lekeni ba cipokelele. Amen.

Lesabe naimwe.

¹²⁵ Nomba tukwetefye inshita iinono iya...Nomba twalapepelako abalwele. Ndi uwansansa nganshi ukwishiba ukuti kuli isubilo lya balwele. “Nine Shikulu Uyo uwelela amampulu yobe yonse, Uyo uuposha amalwele yobe yonse.”

¹²⁶ Kabili Ine, iceni fye nga ifyo cili, Nacisunkanishiwa akashita akanono akapitapo, kuli nacifyashi munono uulambalele pali ubu ubusanshi. Kabili ena mu—mu mulwele wa bulwele bwa Hodgkin’s. Kabili Ndecetekela ni nyina uwikele pano pamo nankwe. Ndi uwashininkisha nganshi. Ee, cilya cishinka, ukutila uyu nyina alenjeba pa mwana wakwe, kabili Naleesha ukumukoselesha.

¹²⁷ Kabili ukwitwafye, pamo, panuma ya iyi mbila. Ndeumfwa ukutila ipusukilo e cintu cakubalilapo. Ubundapishi bwacibili. Ukundapa limbi kuti kwabapo ukufika kumpela ya mweo wenu, imyaka iingi. Cena limbi kuti ca mupela insansa na ukusangalala ilyo muli pano pe sonde, lelo cena cili nokupwa ne shenu... pa mfwu yenu. Lelo umweo uyo wapusuka, walikwata u Mweo wa Muyayaya. Wena tekuti onaike, nangu takuli nangu cimo icingatala ukufumya cena pali imwe. Nauya mu ma Buuku yakwa Lesa, kukwimishiwa munshiku shakulekelesha. Icintu icikalamba cintu cakubalilapo, “Icakubalilapo, u Bufumu bwakwa Lesa na ubulungami Bwakwe, ifintu fimbi fikalundwako.”

¹²⁸ Kuti natemwa fye ukupela ubunte bumo ubwa bundapishi ubwa ubu bulwele ubwa kutinya ubo uyu mwanakashi wacaice aleculako. Kabili kwaciba bamo inshita iyapitapo... Bena limbi kuti babapo muno lucelo. Ine nshiba pano ilingi line ukwishiba nani ni nani. Mwebengi imwe Nshamishiba. Lelo kwaliko umukashana uwa caice kuno mwi sukulu lyesu ilya pa mulu. Kabili ena alecula no bulwele bwe pwalonda ubwakukana cimfya amalwele ubwitwa Hodgkin yonse ayaisa, kabili atwelwe kuli dokota, ubwa ifi fibulungwa ifikulu ukulafuma pali ena. Kabili basendele iciputulwa ca cibulungwa nokucituma, kukusanga ifyo cali. Kabili cena cabwelele, “Ubushakwata ubundapishi ubulwele bwa Hodgkin.”

129 Kabili nyina talefwaya umwana ukwishiba ifyo ubwafya bwakwe bwali. Kabili ba dokota bapandile amano nyina ukumulekafye ukutwalilila ukuya ku sukulu, pantu akwetefye inshiku ishingiri ishakuba no mweo. Cena mukulekelesha cisalanganina ku mutima. Kabili ubulwele bwa Hodgkin's lipwalonda, twalishiba cilya, mu mibele. E ico balitumine u—umukashana uwacaice ukubwekela ku sukulu, ukumuleka ena ukufwa.

130 Nyina ali uwa mwenso. Kabili alintumine pali lanya, kabili atile, “Ndefwaya ukumuleta. Lelo Nalishiba, Munyina Branham, ukutula mu milongo yobe iya kupepelwako, inshita ishingiri, uleta amalwele ilyo wakwata ukusubwa kwa Mupashi.” Atile, “Bushe kuti waba uwa luse nganshi, nga Mupashi wa Mushilo asokolola icintu icili conse pa mwana, ukukana cilanda?”

131 “Ukuba,” Natile, “Nshiletontokanya Ena kuti asokolola cena, nga Ena talecifwaya cena ukwishibikwa.” Natile, “Ine nshiletontokanya ifyo. Kabili pe hema lyandi pano, Ine ilingi line nshikwata imisonkano yaba ngefyo.” Natile, “Mpepela fye abalwele.”

132 Kabili namayo umusepela aishile mumulongo. Kabili Naipwishe nyina ukutula, “Bushe uli mwina Kristu?”

Atile, “Iyo.”

Natile, “Bushe umukashana mwina Kristu?”

“Iyo.”

133 Natile, “Uyo musango uwabipisha uwakufuma mwisonde.” Kabili Natile, “Iwe tawakatale mumona nakabili, nga ena aya muli ilya mibele.”

134 Eico lintu namayo wacaice aishile mumuputule lulya ulucelo. . . Nokupita palya pene fye pacifulo apo umukashana apepelwe; nga ifyo uyu umukashana alaba, mu mamineti fye ayanono. Nalimwipwishe. Nalimwishibe. Kabili Natile, “Bushe niwe na mayo uwacaice ukufuma kwi sukulu lyamasambililo yapamulu kuno?”

Atile, “Nine wine.”

Natile, “Bushe walishiba ubulwele bobo?”

135 Atile, “Ba dokota banjeba ukutula batontokanya ukutula Ndi nokuba fye bwino.”

136 “Ukuba,” Natile, “nga cakutula iwe tauli bwino? Bushe uli mwina Kristu?”

Atile, “Iyo, mukwai. Nshili.”

Natile, “Bushe kuti watemwa ukuba umwina Kristu?”

Atile, “Kuti nacita.”

137 Kabili Natile, “Bushe kuti wapela umutima obe kuli Kristu?” Kabili atile ena kuti acita. Na nyina wakwe abutukile

pamulu nokutila kuti acita pamo. Icili, Nali babatishe bonse muno mwine mucishiba. Nali pepele umukashana uwacaice.

¹³⁸ Kabili inshita yalitwalilile. Kabili mukulekelesha umukashana atendeke ukumfwa bwino, panuma ya nshiku ishinono, ena ukwabula ukwishiba icalubene. Kabili panuma yakashita akanono, bamubwekeshemo kukupimwa, kabili tabasangilemo icili conse ica cena, nakalya. Kwaliba ica . . .

¹³⁹ Nshatemwa ukulanda ifintu ifingi palwa bantu, lelo Nalitemwa ukuba uwacishinka palwa bantu. Kuliko umwaume muli uno musumba, uyo waishibikwa bwino, kabili munyina umwina Kristu umusuma, nga teifyo tekuti abe dikoni uwa cino ichalichi . . . Ndepilibula, uwacetekelwa uwa chalichi. Kabili ena epo ali nomba. Kabili ena acisendele fye pa lwakwe ukukonka ilyashi lya ulya umukashana. Cali imyaka kuntanshi, imyaka ibili nangu itatu kuntanshi, umukashana uwa caice alipwishishe isukulu lyakwe kabili aleenda no mulumendo.

¹⁴⁰ Kabili Namukumenye pa musebo ubushiku bumo, kabili aali nensansa nganshi, kabili apele ubunte ku bukata na maka yakwa Yesu Kristu, panuma ilyo ba mwebele ifyo cali. Umukashana aliyupwa. Alikwata abana. Kabili aleikala uwa nsansa.

¹⁴¹ Kabili wishi esa ku ncende ya kwa uyu mwaume iyamakwebo, kukubeya umushishi wakwe. Kabili Mista Egan pano, uyo uwa—uwaba uwakukonka umulandu inshita yonse. Kabili umukashana alifye bwino kabili uwaundapwa. Kabili apo papita inshita nshi, Munyina Egan? Imyaka iingi iyapitapo, bushe teifyo? [Munyina Egan atila, “Ine, isano, imyaka mutanda iyapitapo.”—Kale.] Kabili ali uwa mweo ileelo, ku bunte ubwakuti Lesa alondapa ubulwele bwa Hodgkin’s.

¹⁴² Owe, cena cisuma nganshi ukwishiba, ukutila mu ma ora aya kupelelwa, ukutila na tukwata umwakufisama. Mulya umwakufisama ni Kristu.

¹⁴³ Ndefwayafye ukupela ulusebo pali . . . kuli imwe bonse, icintu cimo icinono mukulongana, ico cacitikefye. Shikulu ali umusuma nganshi mukwasuka amapepo yenu yonse, ilyo Naleya ku Masamba ku kulongana nomba line, imilungu inono iyapitapo, imilungu ibili. Kabili ilyo twali ku Tulsa, ku musonkano, Nali noku. . . nshali nokulanda, pantu . . . Nali nokukwata ukulongana kulya. Lelo bakapyunga balikwete ukupuputulwa kumbi ukwalecitika, eico Ine tekuti nkwate ukulongana pali ilya nshita. Lelo Nalipitile, ukuya senda Munyina Arganbright, ukumutwala ku California; umukashi na Nne, na Yosefe munono.

¹⁴⁴ Kabili ilya nshita ya bushiku, ilyo twaishile abacelwa, Naumfwile ukutila Oral Roberts na Tommy Osborn bali no kushimikila bulya bushiku. E ico Munyina Arganbright atumine ama hotela mpaka asangile apo twabelele, kabili atile, “Isa kuno mukulongana.” E ico alishile, ena na Munyina Sonmore,

Abena Kristu Bashimakwebo, intungulushi ya chapitala pa Minneapolis. Bena—bena baishile kuli ine.

¹⁴⁵ Kabili Nalingilemo, kabili balekwata icakulya ca cungulo bushiku kale, mu—mu cikulwa cakusefeshamo ica Mayo, incende iikalamba. Aba mamillioni ayengi baikele mulya. Kabili eico namwishiba ifyo Ningomfwa pakuya muncende iyaba ngefyo. Nshaishibe no musango wa kubomfya imyele nama foloko ifyo bakwete pa tebulo. Lelo Nalingilemo.

¹⁴⁶ Kabili ilyo Naingile mukati, Oral Roberts aleshimikila. Kabili aleshimikila pa bwingi bwa bumi, ubwingi, kabili ukweba Abena Kristu Bashimakwebo, ukutula, “Yesu alikete isabi, alibikile mu masumbu, kabili alikwete ilingi ukucila ilyo benga—benga bomfya.” Kabili Munyina Roberts ni kalanda wamaka, nga fintu mwaishiba. Kabili atile, “Kwaliba abantu abengi.” Kabili atile, “Nomba, Ndekula i—itempele kuno lubali, nalimo kuti lyasenda ama millioni yama dolla.” Atile, “Lyakulwa na mabwe ya buuta.” Kabili atile, “Nalilikula citika ukuya mu mulu, kabili indalama Shandi shalipwa.” Kabili atile, “Elyo Naile ukuciluka umusebo ubushiku bumo, ukulolekesha pali cena, kabili ciwa atile, ‘Namwishiba? Abantu bakapita mupepi nokulanda, ‘Filya efyo Oral Roberts acitile.’”

¹⁴⁷ Atile, “Elyo Natile kuli ciwa, ‘Lelo bena balingile ukulanda ukuti, ‘Oral Roberts alyeseshe.’” Ico cisuma. Kabili atile, “Lyena calibikilwe pa mutima wa muntu wa mwi banki, muno mu musumba, uyo uwankongweshe ukucila, mupepi, ama dolla ama millioni yabili ukufuma mwi banki, kukupwisha ubukule.” Ama banki tayacita ico. Mwalishiba ico.

¹⁴⁸ Kabili atile, “Ulya umo shimakwebo, wa mwi banki, epo ali naikala pano nomba.” Atile, “Nshilefwaya ukwita ishina lyakwe, pantu ena tabamo sana mu bantu ba mwisulo wa Mbila nsuma. Lelo,” atile, “ena ali muno.” Kabili atile, “Nshi—Nshiletontonkanya ena alalanda nokuba uwina Kristu. Lelo,” atile, “icintu cimo calishesha umutima wakwe, kabili ena ali nengele ukukwata indalama.” Atile, “Nga cakutula ena alefwaya ukwiminako,” atile, “ena kuti acita ico, lelo Ine nshalenge insoni ulya umuntu.”

¹⁴⁹ Umwaume aliminine, atile, “Nshili uwansoni, Mista Roberts,” no kwikala panshi.

¹⁵⁰ Nomba Nalingilemo, kabili naliikele panshi. Nomba Munyina Roberts, lilya linefye apitile, aishile nokwisa poshanya amaboko naine, kabili nokunjimya mumaboko yakwe. Kabili ama miniti fye ayanono, lyena, mucine, abantu abengi balishile, namwishiba, ukulanda ilyo tucili tulelya, kabili ukufwaya ukulongana nefyaba ngefyo, naba kapyunga.

¹⁵¹ Kabili nomba Demos Shakarian aimine. Ena nikateka wa chapitala ya Baume ba Shimakwebo ba Mwisulo wa Mbila nsuma. Kabili aliminine kabili atile, “Namwishiba, Ndeumfwa

fye ukutungululwa ukutila Munyina Branham alingile ukushimikila kuli ifwe, muno bushiku, imbila yakulekelesha.”

¹⁵² Ukuba, Nshashibe ifya kulanda. Kabili atendeke ukunjeba palwa abantu lyena abaikele mulya, atile, “Uyu pano ni *Wakuti-na-wakuti*. Ine mukumenye ileelo.” Balenjeba ukutila balikwata ifi iyapwililika fitatu nangu fine ifikulwa fya mu musumba ifya Miracle Mile’s. Aba mamillioni ayengi kabili bakateka wa ng’ombe, nefyaba ngefyo, kabili cinshi ico Ine ningalanda mukulongana ukwaba ngefyo?

¹⁵³ Lelo, namwishiba, caliba lyonse icawamapo ukunakila. E ico Naimine kukulanda mubusuma ubo Ninga cita. Kabili ku mpela ya kulongana. . .Cena conse caba kunse ya butantiko ukupela ubwite bwa cipailo mu ncende nga ilya. Lelo, namwishiba, Nalipangapo ubwite bwa ku cipailo pa kulongana kwa fililo. E ico Natontonkenye ukutila, “Ili pano ishuko ilisuma.” Kabili Na—Napangile ubwite bwa ku cipailo. Kabili bonse balya baume aba fyuma na banakashi baishile kuli Shikulu Yesu, nokupela imitima yabo kuli Shikulu.

¹⁵⁴ Nalisungunguka pa mukankala wama millioni umo, umukashi wa mukankala wama millioni necisote icinono, na masako ayasuma pesamba ukushinguluka ku lubali, nalimo camusendele umwanda wama dolla. Kabili ifilamba fyalekonkoloka pa masaya yakwe. Ena alinjikete pa kuboko, atile, “Munyina Branham, umutima wandi nausela.” Atile, “Natontonkenye ukutila Nali umwina Kristu, mpaka nomba.” Atile, “Ndefwaya ukubombela Shikulu.”

Kabili Natile, “Natotela.”

¹⁵⁵ Kaabili nomba muma miniti ayanono, Icintu cimo catile kuli ine, “Pepelako abalwele nomba.”

¹⁵⁶ Natontonkenye ukutila, “Oh, iyo. Ine tekuti ncite ico. Nincilinganya kale i. . .ici cikulwa icikalamba ica kushaninamo. E ico nga Napepela abalwele, bena bali no kutontankanya ukuti Ine mucine nalifulungana.” E ico Natontonkenye ukutila, “Mucine Shikulu tekuti anjebe ico. Limbi Ndi fye uwanaka pamulandu wauku ukulanshanya, e ico Nalapitafye lushenshe nokwikalako panshi.”

¹⁵⁷ Kabili Naile pesamba kulubali lwe tebulo lyakwa kalanda, pesamba ukufika kumpela sana, kabili naikele pamo na Munyina Jack Moore, twaikele palya, tulelanda. Kabili Napilibwile ukulongana ukubwesha kuli kateka, Mista Shakarian.

¹⁵⁸ Nomba lintu ena—ena aimine, kabili atile, “Namwishiba?” Oh, Lesa afwile namukumya pakubeya. Atile, “Ndeumfwa ukutungululwa ukukwata Munyina Branham ukubwela no kupepelako abalwele.”

Natontonkenye, “Oh, ico cili icalungama bwino bwino.”

159 Kabili Nalimine no kubeba. Kabili Natile, “Nacumfwa ico. Kabili Ndepepa ukuti Lesa ambelele uluse. Lelo cena cawama umuntu umo akumishiwa, pamo, namwishiba, ukutulenga ifwe bonse ukwishiba ukutila cena kubomba kwa Mupashi.”

160 E ico Natile, “Nomba, Ubundapishi bwa bulesa tekwikata fye icipilala cabaswa. Tecintu fye cimo icakwelenganya. Ni Lesa umo wine uyo wacipususha bonse aba bantu pano pakashita akapitapo. Ena ni Lesa umo wine uyo undapa abantu bonse abo abali muno, ku cicetekelo fye icaanguka ukucetekela Ena.” Natile, “Bushe mulecetekela cena?”

161 Kabili nomba ku cankama, ku chalichi candi. Nga fintu mwaishiba, ubupyungishi bwandi bulecinja, kabili, oh, we kucinja kwa bukata we! Oh! Imwe bonse muleibukisha Ifyebo ifyo ifilila. Kabili cila nshita cena cilacitika, icintu cimo cilacitika, lintu Naingila mukati ukulanda pali ico, isa—isa kuli ine, “Landa kuli ulu ulupili.” Mulandu nshiabela ifyo? Caba cicetekelo. Icintu icili conse caba ku cicetekelo. Icicetekelo te cintu cimo ico mubomba. Icicetekelo cintu cimo ico mukwata.

162 Kabili Natontonkenye ukutila, “Nga. . . Ine lyonse naliba ne nsoni pa citetekelo candi, ku bantu, ubusuma ubo Shikulu aba.”

163 Ena alilangisha ifintu, ukulanda ifimonwa. Ifintu fyonse fyaba ifyapwililika. Imwe mwe bantu mwalishiba ico. Te muntu palwakwe. Te muntu. Ni Lesa eucita ico.

Kabili ici icikope *pano*, ifyo cena capita mwi sonde!

Balya bamo mu Germany!

164 Kabili kuno imilungu inono iyapitapo, nalimo abeni muno tabatala monapo cena, bena bakopele nacimbi cimo. Ninkwata cena ku ng’anda. Cena mimonekele yakwa Shikulu Yesu ukwiminina kunuma fye apo Naiminine. Kabili amaboko Yakwe yali kunse, kabili indimi sha Mulilo ukulapupuka ukufuma mukuboko Kwakwe, ilyo Nalelanda pe sambililo, “Landa kuli ulu ulupili, ‘Sela,’ kabili witwishika mumutima obe, lelo cetekela.” Kabili natukwata ici. Cili muli Techni- . . . Amalangi ya Fya fita nefya buta. Kabili nabacikwata ku ng’nda nomba. Kabili balepanga. . . Calipimwa nomba kuli sayansi, nafimbipo, nomwakupimina. Kabili cili nokufumishiwa nomba line, nacimbi cimo, ico icilepanga nalimo mutanda aya fyena mufifulo ifyalekana lekana, pali ifyo ifyakopwa.

165 Ici ecacilishapo pali fyena fyonse, tacatala monwapo. Pali umwefu Wakwe—Wakwe, icinso Cakwe, imimonekele Yakwe, amaboko Yakwe ayafumina kunse. Kabili Naliminine mukati fye nga *ifi*, kabili uko Ena abikile amaboko Yakwe, imwe teti mumone ne cifulo candi, nga filya; umutwe wandi, elyo amakasa yandi panshi pa mushili, umutwe fye na molu, cilya fye ceka ecasheleko. Mwamona? Kabili Ena—kabili Ena naiminina na maboko Yakwe nga *ifi*. Kabili Nalimishe amaboko yandi nga *ifi*, ndeshimikila, ndelanda, “Landa kuli ulu lupili.” Kabili pali

ilya nshita, icintu cimo calicitike. [Munyina Branham alisha umunwe wakwe—Kale.] Kabili bena bakopele icikope ca Cena nga filya. Kabili Cena cali kulya, kunuma, fyonse mu malangi. Kabili icikalamba, nga ifyo Lesa atantika, basiketi iikalamba iya ba cananika naibikwa mupepi.

¹⁶⁶ Ena ni Cananika wa mu Mupokapoka. Kabili nikwisa uko mufumya opiumu? Ukufuma muli ba cananika. Ico nacilungama. Ni Opiumu nshi Lesa akwata? Umutende. Opiumu imulenga fye imwe ukulabako amafya yenu yonse. Abapeepa Opiumu, uyo emusango baipailamo abena nailya opiumu. Lesa alikwata Opiumu. Ameni. Ena alanasha ukukalipwa konse, alondapa amalwele yonse, alafumyapo ukusakamana konse. Ilyo lyonse tulepemena muli Opiumu Yakwe, tuli mu mutende.

¹⁶⁷ Na basiketi iikalamba iya ba cananika naikalafye kuntanishi, apo Nalelanda, pa cintamba.

¹⁶⁸ Kabili Napepelele abalwele, kulya ku Tulsa, kabili Nalyendele ukufuma kulya kabili nafumine panse. Kabili nalimo ama miniti ikumi panuma . . .

¹⁶⁹ Ine tekuti mfwaye ukwita ishina lyakwa kabila wa mbilansuma. Lelo umwanakashi wakwete ukukalipwa kwamu mungololo, uyo uwalebombela uyu kasabankanya wa mbilansuma, ali ni kalemba. Kabili ena alelemba nga *ifi*, pantu amaboko yakwe na mapeya yalihakene. Ena alelemba nga *filya*. Na uyu—uyu umukalamba kabili uwashibikwa kasabankanya wa mbila nsuma kulya ku Tulsa, alimwingishe incito mu ncito yakwe, ukumupela umulimo.

¹⁷⁰ Kabili atendenke ukwenda mucikulwa. Kabili mukupumikishafye amaboko yakwe yalinashiwe, kabili atendeke ukutolauka nokubilikisha, mpaka ena acebwishe amano ya muntu onse pa mulu palya. Kabili ulya umwanakashi uwatemwikwa ukuponena pa makufi yakwe, nokwimya amaboko yakwe kabili ukula tota nga *filya*. [Munyina Branham atota indupi shakwe—Kale.] Ubukata bwakwa Lesa, pantu Lesa ali mulengele umuntungwa, inshita fye inono panuma ye pepo.

¹⁷¹ Kabili Naingile mukati, kukumfwa nokumona ico alelanda. Atile, “Nacilaendafye mucikulwa.”

Kabili Natile, “Ukuba, ukutotela kube kuli Lesa.”

¹⁷² Kabili Nalipilibwike, natendeke ukwenda munshila imbi. Kabili Nalyumfwile, pesamba sana palya, ukumona aba bembu bonse baleisa capamo, ukumona ico cali ubwafya. Kabili apa pali umuntu uwaletendeka ukulanda, Munyina Gardner, umuntu umo wine uwampele iyi nsuti.

¹⁷³ Abengi pali imwe mwalimwishiba Munyina Gardner. Munyina Gardner, mu Binghamton, New York, kalapashi uubomba ku Oldsmobile pa myaka itatu iyapitapo, alishitisha imyotoka sha Oldsmobile ukucila umuntu onse mu United

States. Kabili apupukila mu ndeke ya muntu fye. Kabili panono ukucila umwaka umo uwapitapo. . . I Shina lyakwe ni George Gardner. Kabili ena. . .

¹⁷⁴ Kensha wa ndeke yakwe, palwakwe, aleensha fye eka, kabili aponene kabili, indeke, kabili ya poseshe amakufi yakwe, inkolokoso shakwe. Kabili amolu yakwe na makasa yali ayakosa, kabili ena aendele nga *ifi*, kensha wa ndeke yakwe.

¹⁷⁵ Kabili epo ali lintu ipepo lyapelwe, kabili aliifumishe umwine mu cikulwa umwabelele amalila. Kabili balimufwaile umuputule mupepi, pamo, pakutila ena takwete ubwafya ukwenda ukubwela na ukuya. Kabili ubu ebwali ubunte bwakwe. Ena aile mu muputule wakwe nokwikala panshi; ukwabula ukuba na umwina Kristu. Kabili atile, “Munshila imo neyi nankwe, Ndecetekela ulya umunono umwaume uwe pala uyo wacishimikila kulya lubali muno bushiku.” Kabili atile atendeke ukumona ifikondo fyakwe fyatendeka ukututuma. Kabili alitolweke pamakasa yakwe, onse uwapwililika.

¹⁷⁶ Ukwiminina kunse kulya, alelumbanya Lesa, ukwiminina, aleimya amolu yakwe pa mulu-na-panshi nga *filya*, kabili mumbali ya makasa yakwe ne fintu fyonse, ukupela fye ubunte ku bukata bwakwa Lesa.

¹⁷⁷ Umuku naumbi, iyo tatulapepelako abalwele. Naleikala na Munyina Arganbright. Kabili umunandi umusuma, Leo na Gene, balishiba ifyo lanya yaba. Ukulisha lamya, kabili Munyina Arganbright aleasuka. Kabili, namwishiba, imwe tekuti mube ukuli konse. Lelo, cacitike ukuba, ukutila Nabulile lamya.

¹⁷⁸ Ndecetekela fyonse fibombela munshila yakwa Lesa iyalinga. Bushe tamulecetekela? Ndecetekela eco uyu namayo munono abelele pano. Ndecetekela emulandu imwe bonse mubelele pano. Nincetekela uyo wine emulandu Mbelele pano, ukutila ifwe tuli abaampana capamo kubukata bwakwa Lesa, pa mulandu umo. Cinshi ico twacishila mu mpanga sha menshi makasa, ukuba muno muno lucelo?

¹⁷⁹ E ico Nabulile lamya, pantu Munyina Arganbright tali mu muputule. Kabili yatile, “Ndefwaya ukulanda na Munyina Branham.”

Natile, “Nine Munyina Branham.”

¹⁸⁰ Ali muntu umu Spanish. Atile, “Mukwai, Ninjishiba tamuli amano, mupepi, kuli ine ukwipusha ilipusho Nalaipusha.” Atile, “Kuti Naelenganya ifyo abantu batinta, kabili na fimbipo. Lelo,” atile, “Ndi minshoni mu Mexico.” Kabili atile, “Kuno lubali, Njikala kuno mu La Crescenta. Kabili Nacishiba fye, ama ora ayanono ayapitapo, ukutila muli mu musumba.” Kabili atile, “Nabweshe umwana wandi, ukwasha ukumubweshe kuli iwe nangu Munyina Roberts, nangu bamo ba munyina abo abapepelako abalwele.” Kabili atile, “Ukuba ukuti mwana wandi, icitetekelo candi, Ndemona, caliba fye icanaka panono.”

Atile, “Umwana wandi talati abe imyeshi ya kufyalwa ine kabili alefwa na ipwalonda.”

Kabili Icintu cimo catile kuli ine, “Kabiye kuli ulya mwana.”

¹⁸¹ “Ukuba,” Natile, “mukwai, Nalasenda Munyina Arganbright, kabili mwalamweba uko umwana abelele, Nalamukumanya.” E ico asenda. . . Naita Munyina Arganbright, kabili amweba.

¹⁸² Eico twaile muli motoka nokuya kulya. Kabili Nakumenye umukashi wakwe umunono. Kabili ena ukuba umwina Mexico, nangu tamoneke cena. Aali uwabuuta inkanda, iisuma, lelo aali mwina Mexico. Ukuba, abena Mexico, inshita ishingwi, ba sweshi, pantu besa pakati kaba Spanish naba mwenye baku India. Kabili kwaliba bamo balya ba mwenye baku India abakwatafye iisweshi, iyabuta-tutu. Kabili lyena umukashi wakwe ali umu Finnish, umusweshi umwine mwine, umwanakashi umunono umusuma nganshi.

¹⁸³ Kabili Nalile ku cipatala nankwe, ku kumona umwana wakwe. Ilyo Naingile mu muputule, bamubikile mupepi fye na icisaka naba nursi. Pantu, akanya akanono, lelo nomba imyeshi fye iya kufyalwa ine, kabili kafyelwe nepwalonda mu ncendwa, ifyo fyafimbile kunse mupepi nokufika *apa* ukufuma pacinso ca kako, nga *filya*, ukufumafye nga *filya*. Kabili naba dokota balyeseshe ukubombela. Nefibala ifikalamba ifyashika fyalepwilwe ukushinguluka umukolomino wakako uunono, ukushinguluka konse. Tacacilesehe; cacilengele fye ukutwalilila ukufika ku lulimi lwakako. Nencendwa ishino ishaisuka nga *filya*, nefibala ifikalamba ifyashika. Nolimili lwakako ulunono. . . Akanwa akanono akashacilile *apa* ubukulu. Kabili ululimi lwakako, nalimo *filya* ubukulu, ukufimba, calisunkile kunse nga *filya* ubutali, kabili caishileba icafita. Kabili cena caisele ukupema ukufuma ku myona ukwisa panshi, ilyo cafimbile mu mulu wa kanwa ka kako. Kabili ifyo fine, cena caputwileko umupu wakako, ukufuma *apa*. Bena balepwile akapunda mu mukolomino wakako. Kabili kalikwete umutolilo uunono uwa kanono. . . kwati kakopo akanono mu mukolomino wakako. Kabili amaboko yakako ayanono yali muli fitute, nga *ifi*, pa kutila kena tekuti kafishe ukufumyapo ulya umutolilo ; kena kuti kapwilila. Nepwalonda, ukukonkoloka, kabili nursi aimine palya necintu cimo icakukulilako kulya ukukonkoloka kwa lilya ipwalonda ukufuma muli ulya umutolilo, nga teifyo kuti kapwilila nokufwa.

¹⁸⁴ Kabili wishi aendele ukuya kumbali ya busanshi, kabili atile, “Ricky, we mulumendo umunono uwakwa taata!” Atile, “Taata naleta Munyina Branham ukukupepelako, Ricky.”

¹⁸⁵ Ilyo atile, “Umulumendo umunono uwakwa taata,” umupashi wandi wafumine fye pali ine. Nafililwe ukutwalilila ukushipikisha kuli cena. Naikatilile fye kumbali ya busanshi.

“Umulumendo umunono uwakwa taata.” Kabili nomulumendo munono, kabili uwabulamba ngefyo aali, alishibe ukutula ulya ali ni wishi. Kabili atendeke ukukoloma nga filya, kabili utumaboko twakwe utunono nga filya. Kabili ena ukweshu ukupampansha umulumendo umunono pa mutwe. Akanya akanono akabusu, akafyalwa muli ilya imibele. Ine tekuti nande fye. Ine fye. . . Namwishiba, iwe kuba fye uwaisushiwa nganshi, iwe tekuti ulande fye nangu cimo.

¹⁸⁶ Naloleshe panshi, namwene yalya amaboko ayanono panse ukufuma pesamba yafilya fitute ifikalamba. [Munyina Branham apanga icongo ca kukoloma—Kale.] Kabili ukupanga icongo akafumya umwela. Kabili Natontonkenye ukutula, “Bushe ico tecabulanda te cabulanda!”

¹⁸⁷ Kabili panuma Naesha ukuibweshamo nemwine, icalinga ukweshu ukutontokanya pa cintu cimo, Natontonkenye ukiutula, “Yesu, bushe Mulepilibula ukutula Mulakwata ukusangalala ukukana mona ico? Ine tekuti nsetekele ico. Ine tekutifye nsetekele ukutula Iwe ufumye ubukata ukufuma muli kalya akanya akanono ukucula ngefyo. Cena tekuti cibe ifyo. Nga cakutula cena kuti canenga ine ukuba, umubembu, ndeumfwa kwati Ndacita kuli ulya mwana, ni cinshi ico cinga cita kuli Imwe, intulo sha luse lonse? Ni cinshi ico cinga cita kuli Imwe?” Kabili Naliosolepo ifyebona na nombu.

¹⁸⁸ Aleesha ukwangala nako, ukukalenga ukutalala. Kabili umubili wakako uunono nakafwala netebela, kwatifye. . . Umubili uunono, nafyonse, takacilile *apa* ubukulu. Kabili umutwe wakako ewali icilundwa icakulishapo, incendwa shakwe ishafimba nganshi. Kabili balikwete icintu cimo mumutwe wakako, ukulesha umutwe wakako uunono ukukana lepuka. Namwishiba, icisalu; incendwa shakwe shalifimbile ishikalamba nganshi, kunge nga *filya*, ukuleka ukukana poleka. Kabili nashi aiminine palya.

¹⁸⁹ Kabili Naloleshe panshi ku muntu umunono, kabili Natontonkenye ukutula, “Shikulu, ni cinshi ico Mwingacita nga Mwaliminine pano?”

¹⁹⁰ Nombu, Ndemona ukutula Ndi mucintamba. Kabili Ndemona ukutula Lesa epo ali. Lelo camoneke kuli ine ukutula Icintu cimo calandile mukati ka mweo wandi, kabili atile, “Ndelolela ukumona ifyo muli nokucita palwa cena. Napela amaka Yandi kwi Chalichi.” Kulya mukabwele nakabili kuli, “Landa kuli ulu lupili.” “Napela amaka Yandi kwi Chalichi, kabili Ndelolela ukumona ifyo muli nokucita.”

¹⁹¹ Ndesunguka nga ilya e mibele Yakwe kuli ifwe inshita fye yonse, iyo Alelelela ukumona ifyo tuli nokucita. Nga palwa fishibilo fyanshita ifyo tushimikilapo? Nicinshi ico Akacita? Alelelela ukumona ifyo twalacita.

¹⁹² Ukuba, Nalikwete akanya kakwe akanono mulyandi, mu minwe yandi, nga *ifyo*. Kena kali akanono nganshi. Kabili Natile, “Shikulu, umfweni ipepo lya mubomfi Wenu. Kabili ku cicetekelo, uko Nacetekela ukuti Imwe eflyo mwaba, Nabika pakati ka ici ciwa cepwalonda nomweo wa mwana, u Mulopa wakwa Yesu Kristu. Pakati kakwa kepaya nomwana, Umulopa, kucicetekelo eko Nabika ico.” Kabili Nshalandile icintu nacimbi icashala.

¹⁹³ Napilibwike fye nokutampa ukuya panse. Wishi alinkonkele. Atile, “Munyina Branham, Shikulu abika pa mutima wandi ukukupela icekumi.”

¹⁹⁴ “Oh,” Natile, “munyina, witontonkanya pali ico. Iyo.” Natile, “Nshilekabila indalama, munyina.”

¹⁹⁵ Atile, “Lelo Nalisungile icekumi cimo.” Oh, indalama ishinono, Nindaba apa eflyo shali pamo, Ndecetekela nalimo ama dolla amakumi yasano. Atile, “Shikulu acibikile pa mutima wandi ukucipela kuli iwe.”

¹⁹⁶ Natile, “Leka nkwebe ici. Nalacipokelela, elyo kabili walashibwekeshamo nokushipela kuli Ricky munono palya, pa yakwe—yakwe amalipilo yaku cipatala. Pantu, uli kashimikila. Nalishiba ifyo caba, ifyo indalama shipilibula. Kabili iwe, minshoni, kabili Nalishiba ukutila cisenda indalama. Kabili walikwata ulupwa, kabili nashonse inkongole shakuli ba dokota. Ushibwekeshe pa malipilo yakwa Ricky munono.”

¹⁹⁷ Atile, “Nshilefwaya ukucita ico, Munyina Branham. Cena teshakulipila ba dokota. Cena shakulipila bakapyunga.”

¹⁹⁸ Kabili Natile, “Ee, lelo Ndeibwesesho kuli iwe.” Kabili Naliukene.

¹⁹⁹ Kabili Nalile kulya ku ng’anda, kabili mumaola ayanono, shilya incendwa shaponene panshi, kabili nolulimi lwakwe lwabwelele muncende yaluko. Lesa aundepe ulya umwana munono. Balefumya pinto ulucelo ulo Nafumineko, ukufuma mumukolomino wakwe.

²⁰⁰ Cena casakamike Ululamba lonse ulwa ku Mboshi. Dokota uwalumbukwa atumine umwana wakwe, no mwishikulu wakwe. Kabili baisele umusebo, ukucila, bamailoshi amakumi yane nangu yasano, mu Pasedena, nokwisala umusebo uo Nali nokupitamo, ukuya pepela ulya mwana uwakwete cipumputu kuli bongo bongo. Balikalashile inyeleti ya penincilin, nokulenga ipwalonda ukufuma kuli iyo nyeleti ya peninincilin patanta lyakako. Kabili Ndi uwashininkisha ukutila Shikulu alikondepe.

²⁰¹ Ilyo fye nshilafuma pa ng’anda, lamyayalilile, yatwalilile ukulila. Munyina Arganbright, Nalimumfwile ukutalikishanya nomuntu umo, atile, “Iyo, Ine tekuti ncite ico.”

²⁰² Ilyo Naleninafye muli motoka, kwali a—akanono akambaya mbaya akaishile. Tali umbi lelo munyina wandi umunono

umwina Mexico no mukashi wakwe! Bonse babili balelila fye no kulumbanya Lesa. Atile, “Munyina Branham, Naleta ici icekumi kuli iwe.”

²⁰³ “Oh,” Natile, “munyina, Ine tekuti mpokelele ico.” Natile, “Ine tekuti nciците fye.”

Atile, “Lelo Nacileta kuli iwe.”

Atile, Natile, “Nalikwebele ukuibika pafyakulipila fyakwa Ricky.”

²⁰⁴ Atile, “Muno lucelo, ilyo Naciya mukupela dokota ici icekumi, ukuya pafyakulipila fyakwa Ricky, dokota acitila, ‘Iwe taukwete imisha nangu imo.’ Acitila, ‘Ine nshakwete nangu cimo icakucita neco.’ Atile, ‘Ico cintu cakupapusha icikalamba.’ Atile, ‘Ine . . . Iwe taunkwatile imisha nangu imo.’” E ico atile, “Bula ici, Munyina Branham. Shikulu alinjebele ukutila iwe wali nokucisenda.”

²⁰⁵ Natontonkenye ukutila, “Oh, tekuti Ncite ico.” Natile, “Shikulu, Nshileumfwa ngo kucicita.”

²⁰⁶ Elyo icintu cimo caishile kuli ine. Yesu aliminine ubushiku bumo, ukulolesha abantu abacuma mubwingi bwandalama shabo. Oh, balikwete ifingi, e ico balepela ifingi. Kabili mukamfwilwa umunono alishile namakobili yatatu, kabili efyonse ifyo akwete. Ebwikashifye bonse ebo akwete, kabili aliposelemo. Nomba ifwe nga twaciitile cinshi? “Oh, nkashi, wicita ico. Huh-uh. Nawishiba, tatulekabila ico. Wiposamo mukati. Ubo ebwikashi bobo bonse.” Lelo Yesu amulekelelye aya kuntanshi nokucita ico, pantu, “Cena cintu capalwa ukucilapo ukupela ukucila ukupokelela.”

²⁰⁷ Ninkwata icekumi icinono. Nshishibe ifyakucita nacena. Nkayabika kucifulo cimo, mumulimo umo kubukata bwakwa Lesa, pacifulo cimo icawamisha ico Ningabikako.

²⁰⁸ Cena ni cinshi? Cena Bukata bwakwa Lesa. Cena Maka yakwa Lesa. Ifinshingwa filepona; ukumoneka kwakwa Kristu, uyo wine emulandu ifishibilo nefisungusho filemonekela. Cena ni lulya u Lubuuto ulukalamba ulwa Mwana ulwalemonekela pantanda shalucelo, nobundapishi mumapindo Yakwe. Kabili nga cikutila Aleleta ubundapishi ukufuma kukulangisha kwa Kubapo Kwakwe, cinshi ico Ali nokucita lintu Aisa mu Muntu? Iyi mibili yesu iyonaika ikapilibulwa nokupalana no Mubili Wakwe Wine uwabukata. Cikaba shani ilyo Akesa? Mpaka Akese, tuletasha pa Lubuuto lwa Mwana ulwa Mukubapo Kwakwe, nga fintu intanda shalucelo shinina mumpanga sha Bukata, kabili naikala kulya kukusengela Ukwisa Kwakwe muli ino ola iyamfifi.


Natupepe.

²⁰⁹ O mwe Shikulu, ifwe twali Mutemwa nganshi mpaka, Shikulu, takwaba ukulanda inshita . . . Ifwe tatumfwa ukunaka

ukupela ubunte pamalumbo Yenu. Lelo ola ili pano nomba, kuliko abantu abalwele abalelelela. Mwalishiba ubu bunte. Bwena bwali, ukulingana nefyo Naishiba, Shikulu, cine icituntulu. Ifyo kensha wandeke aiminine kunse kulya, ukulangisha ifyo engeminina pamakasa yakwe, kabili nemibele yonse iyo mubili wakwe wabelelemo; kabili aimishe itoloshi lyakwe nokulangisha amakufi yakwe namolu ayacenwa nokocewa, uko ba dokota baeseshe ukubika amafupa capamo. Mwalimona umwanakashi naiminina palya nakalaso pa cinso cakwe, kabili cena nokubomba kufilamba fyakusangalala, ilyo alandile pakukalipa kwamafupa aliposhiwe ku Maka Yenu. Kabili pali kalya kanya akatemwikwa, kabili ubunte bwakwa wishi na balya abalipo.

²¹⁰ Nomba, Shikulu, Imwe muli fye abakalamba muno lucelo, muno mwihema, nge fyo Mwaba ukuli konse mwisonde. Kabili Mwalilaya ukutula uko twingakumana capamo, ukutula Mukaba pakati kesu. Nomba twalaita abalwele abo Mututumine muno lucelo. Kabili twalabapepelako, kabili twalapepa nemitima yesu yonse, ipepo lyacicetekelo. Kabili shi Mwinga pususha abalwele no kubemya. Kabili nga balicitile imembu, babeleleni uluse, Taata, ilyo tuleyebelela imembu shesu kuli umo nomubiye, nokuipapelako umo nomubiye. Kabili Mwatile, “Ipepo ilibomba, ilyamukosha ilyamulungami lyakwatisha amaka.”

²¹¹ Natwishiba umo uulele pano pamo naifwe muno lucelo, alifye nyina umwaice pamo naba abana abanono. Shikulu, ukulingana na ba shing’anga, ali mupepi nempela yabulendo bwakwe. Lelo twapepa, mwe Lesa, ukutula Mwalaiminina pakati kakwe na ulya umulwani. Kabili ilyo twamusuba no kumupepelako, lekeni Amaka Yenu yekate ulya umweo uwa milimo yakwe. Ico calaleta icicetekelo nokulubulwa. Kabili lekeni aye ku ng’anda nokuba bwino, nokupela amalumbo, nokuba ica—ica kulangisha kwa Lutanda lwa Lucelo, ku bukata bwakwa Lesa. Ameni.

²¹² Munyina Mercier, nomba, ilyo tulesenda aba bantu ukupitila mukulanshanya, abantu abaleisa. Twalaita fye iyi mpendwa. Kabili bena nababikwa pa fyatantikwa ifya balya abakupepelwako. 

58-1130 Kacefya, Bushe Ubushiku Bwafika Pesa?
Branham Tabernacle
Jeffersonville, Indiana U.S.A.

BEMBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Icishibisho ukufuma ku mwine kalemba

Insambu shonse tashisuminishiwe. Ili buku kuti lya lembwa pali pulinta yapa ng'anda ku kubomfya kwa muntu pa lwakwe nangu ukupela, ukwabula amalipilo, nge cipe caku sabankanya Imbila nsuma iya kwa Yesu Kristu. Ili buku tekuti lishitishiwe, ukulembululwamo ayengi, ukubikwa pa mwela, ukusungila muli ba mashini, ukwalula mu ndimi shimbi, nangu ukuli bomfya ku kulomba indalama ukwabula insambu shalemwa na ba Voice Of God Recordings®.

Nga mulefwaya ukwishibilapo nafimbi nangu ukufwaya na fimbi ifyabapo, twalomba tumeni kuli ba:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org